

瞿忠宣公集

瞿忠宣公集卷六

畱守封事

馬進忠大捷疏

奏爲塘報事本月二十日準提督川楚秦豫等處水陸援
勦官兵總兵官太子太傅武昌侯今晉封鄂國公馬進忠
塘報前事內稱竊照口馬南嘶塗毒生靈凡爲臣子者無
不切齒思奮以雪前讎本爵于十月廿四日會同撫院程
景頤監軍道田旣庶商酌進勦于廿五日隨發昭武伯馬
惟興掛印總兵官馬雙駟等率領健旅馬騎五百員名從
小坪繇花園直搗奉天晝夜兼行二百餘里于廿六日未
迄黎明到府內有坐鎮固山楊應元統領口口登城防守
廿七日五鼓我兵奮勇劈砍入城當陣生擒固山楊應元

併子姪牛祿楊雲楊龍楊鳳口官二十餘名捉獲新寧城步知縣徐治王云貴活口千餘逃脫殺死者不計其數得獲西馬二百餘匹弓二百六十三張箭一千三百二十枝盛甲一百二十三副交鎗六十七桿長鎗不計其數本爵點驗明白隨賞有功將士訖併捉獲固山牛祿縣官隨審明正法梟示矣是役也臨危不退得勝罔懈各爭奮勇遂克奉天以收全功一以作東下之先聲一以鼓全軍之銳氣皆賴皇上之福宗社之靈以有此捷也爲此理合塘報等因到臣竊照湖南北諸勦各擁數萬之衆忠先報國志切吞胡而新封鄂國勦臣馬進忠雄威大略百戰不撓尤稱諸勦之冠去年麻河之戰爲數年來未有之奇捷不意中湘變起諸勦一時退舍而進忠養銳俟時相機克復昔

春首恢常德今冬先克武岡使我恢永取寶之兵皆有迎刃破竹之勢而合楚粵之聲氣爲一家永寶之營壘如臂指則尤今日收復湖南之一大機會也所有陣前有功各員馬惟興馬雙騶等相應敕部議敘并乞頒敕獎勵該勦尅期進取應補敕印立與補給尤今日之所不容遲者爲此具奏

永歷三年十一月二十三日具奏奉聖旨覽卿奏勦臣進忠恢常德復武岡戰功累累軍聲大振誠可嘉尙有功諸將俱著一并彙敘該部知道

恤毛壽登疏

奏爲恭述勞臣家難之慘勦臣報國之忠仰祈聖鑒事本月二十日總督僉都御史毛壽登奉命出楚臣等餞之桂

林北郭握手言別意氣慷慨毅然以湖南北恢復爲己任
臣心甚壯之不期行甫一宿卽得壽登手書其僕自鄂國
進忠營中來知其正室李氏長男仁瞻兩妹兩妾相繼病
故僅餘老母幼子寄跡行營伶仃孤苦之懷不覺仰天悲
號肝腸寸絕臣讀未竟亦不覺爲之長歎及細詢其僕云
兵馬數萬退守山谷四面皆口勻米易銀數金壽登以王
事入粵一年老母妻子飄寓馬營饑寒困苦不能殫述饑
粥奉姑而外其妻子至不能具一餐嗚呼亦可痛矣憶壽
登之父羽健爲先帝朝名御史以直諫忤旨落職壽登稟
其教而克光大之奔走行間艱難萬狀其妻若子又克盡
孝養之道以成壽登之忠是以可觀壽登家門之教刑于
之化矣此不能無望于聖恩之優卹者臣于是而更有歎

焉楚中諸勦鎮退處山林雖當敗衄之餘竭忠守死枵腹
決戰爲皇上恢復疆土未有先於鄂國臣馬進忠者去年
春復常德于湖北久陷之日今年冬復武岡于寶永盡淪
之時本月十六日已發兵下紫陽據壽登來書稱馬營專
意做好事殺其口又且一人不殺一牛不搶百姓安堵秋
毫不犯此尤今日諸勦中之所難臣那移御犒銀五十兩
付壽登齋往楚境并望皇上優詔褒嘉頒給爵幣令臣轉
給用以樹楚勦之鴻而作敢戰之氣斯亦鼓舞疆臣之一
法也爲此具奏

永歷三年十一月二十五日具奏奉聖旨

請以監軍御史藍亭巡按衡永長寶疏

奏臣前請監軍御史藍亭巡按衡永長寶四郡者非敢固

孰成見以必不可行之事強我皇上并強在廷諸臣也楚疆盡壞卽有巡楚之官何處是覲轡澄清之地臣與督臣何騰蛟先後數請而必欲皇上之俞允者不過以亭熟練楚事且現在行營與諸勦服習最久所至民懷兵畏借輕熟之長才作恢復之勝算耳在廷諸臣堅持格例謂代巡必自內遣楚按已有臺差是矣然內遣者未必與封疆相宜而王者友且久抱沉疴未易強起受事則舍現在之藍亭而別議差遣恐亦未易得此選也自全陽克復以來亭在軍中裕餉輯兵經營拮据勞績炳然匪特勦鎮服其才力卽督理臣張同敞與之共事數月亦數數移書於臣謂亭真有經濟之才可稱督撫之料亦可以知臣言之非謬矣伏乞敕下都察院卽與具題爲之分道給以敕印於以

鼓勞臣之氣而作任事之心似無容再有齟齬者矣爲此具奏

永歷三年十一月二十九日具奏奉聖旨覽卿奏請以監軍御史藍亭巡按衡永等郡亭裕餉輯兵久著勞績該部速與議覆王者友已有旨了

特舉讜直疏

題爲特舉博雅讜直之才以光儀曹之任以備考選之用事臣惟取人之難也才氣慷慨之流或不如篤行醇謹之士然而朝廷用人欲其下無匿情上有匡裨則庸庸之寡過固弗若錚錚之善鳴矣臣荷皇上倚託之重夙夜兢兢者封疆大計而外惟是愛惜人才爲皇上開廣忠益爲最亟竊見都察院經歷林有聲起家乙榜學茂品優當皇上

登極之初有聲以孝廉隨兩廣臣林佳鼎贊畫帷幄禦唐
藩之釁後以諸將失機有聲與督臣佳鼎監軍夏四敷相
率投水而有聲爲口總兵石壁鉤起鎖縛舟中數日正當
倖解之時而口入五羊矣勳臣成棟反正之後題授蒼梧
知縣以裕餉有功迎駕備禮奉旨紀錄擢陞憲幕昨因論
奏輔臣吾騶奉有嚴旨臣愚以爲艱難之際人才不易如
有聲之才尤不多得其以小臣而言揆席雖不免狂直之
過然忠讜爲心不阿權勢亦于此徵之皇上雖降議處之
旨亦爲優禮輔臣之意非有震怒讜直之心臣竊謂有聲
之才誠宜優錄察憲幕一官例轉清職伏乞皇上敕下該
部將有聲陞轉儀曹仍候考選則朝廷收忠直之益而微
臣亦得伸爲國廣益之心矣臣曷勝悚仄待命之至

永歷三年十二月初一日具奏奉聖旨覽卿疏薦林有聲允屬愛惜人才昨部覆已有旨了這所請該部卽與議奏

特表危城各官疏

題爲特表危城共事積勞積苦之官仰冀聖明嘉與旌拔以勸臣工事臣惟國家建設省會則三司官總領之建設府縣則正佐等官分任之而皆稱爲守土之吏所謂責任地方存與共存亡與共亡者也苟事定則相與營競事變則相率規避守土之謂何桂林自四月以來滇師新挫退扎省城新按旣在梧州舊撫復往平樂微臣以衰病屏羸之身竊當斯任二三客官從臣商確不去者尙蒙聖鑒不沒其勞苦之功而獨有一二忍死同患之道府有司始終

相依禍至不避絕不似平時爭官危急思遁之鄙夫也臣
心感之臣若不奏達宸聰使疆吏壅于上聞其亦何以示
異于棄職守媮便利者之所爲而又何以信朝廷之賞罰
爲將來用事之勸耶請得臚列爲我皇上陳之監司則布
政使沈閱中催糧各鄉巡道副使邵之驛見駐省會憶二
年郝逆劫桂之後隨臣支吾堅守今猶是二臣也桂林府
知府鍾行旦從不離城一步雖亂兵劫印劫庫衙役盡逃
該府出則單行入則獨坐弗敢避也同知高遷通判朱中
困朱朝祚或任催糧或任督運苦雨酷日中奔走數月如
一日也數臣而外或借差而遠避或託病而棲遲總皆絕
離山之跡而脫苦海之波矣猶憶臣自元年畱守口變搶
攘通省官吏無不遠遁惟通判鄭國藩縣丞李世榮堅忍

相隨臣皆具題優擢無非旌勞吏耳今沈閔中邵之驛雖經拔擢而堅忍之勞苦未與表章鍾行旦等同難旣久艱險不避旣不加以陞擢之恩又不優以旌勸之典臣恐任事灰心而勞吏短氣也漢宣帝凡遇良有司姓名卽書之御屏時時省覽之數臣者臣豈忍使之淹鬱不達于天聽耶伏候聖明敕部分別旌拔施行若夫臣標鎮與監紀各官依主人而不去忍九死以奔馳是又臣所不敢爲皇上瑣瀆者也臣無任激切待命之至

永歷三年十二月初一日奉聖旨覽卿奏危城共事沈閔中邵之驛忍死同患鍾行旦高遷朱中困朱朝祚催糧督運允當優擢以表積勞以昭卿公忠不忘患難之誼該部卽與分別具覆餘標鎮監紀等官卿還舉奏用

示至公

楚南近日情形疏

奏爲再報楚南近日情形仰慰聖懷事自武岡克復而後楚粵勦鎮合爲一家彼此同心無不以恢復疆域口爲事勦臣胡一青已於初十日領兵親出十一日進屯東安前鋒直抵冷水灘矣據一青來書毅然以恢復永白任凱奏不遠而東永各鄉百姓多有畏兵而從口爲口嚮導者李東斗以全力守永城衡口時發兵應援似尙未易猝下者此永州近日之情形也嘗寧耒陽俱爲勦臣曹志建分兵屯駐雖離衡不過百里而衡口正復鳴張此衡州近日之情形也鄂國公馬進忠克復武岡生擒口弁楊應元等已有飛札來通據報本勦安置老營于土橋昭武伯馬惟興率各

鎮兵馬坐鎮武攸撥塘直至紫陽河十六日已發兵進抵寶慶此武寶近日之情形也督臣于元燧近已出駐新寧縣衛臣劉之良將出武靖而靖州一帶爲遠安舊部所復卽日發兵攻取黎平此綏靖近日之情形也張光翠袁宗第兩管距武岡六十里未見確報俟樞憲臣毛壽登米琦入營後音耗可以時通臣一面檄會諸勦刻期進取合先據實報聞仰慰聖懷爲此具奏

永歷三年十二月初一日奉聖旨覽卿奏永衡武寶綏靖近日情形朕深加慰卿益鼓勵刻期進勦務令立奏蕩平以膺懋酬該部知道

述各路塘報疏

奏爲彙各路塘報事自全陽復後我師刻期取永臣已檄

興寧侯胡一青統兵前進永國公曹志建扎營雙排以期
首尾夾擊適鄂國公馬進忠恢復武岡張光翠牛萬才有
兵逼寶慶之報臣六月終三路並進之議今有其勢矣似
可卽得志而無難者然據近日塘報則口力頗強口援亦
厚湖南之事正未可輕言底定也據興寧標兵同宜章標
兵放撥冷水灘報稱截獲口將三人口供致順王已往江
西恭順王九月初二日已到漢口見今李東斗差劉副將
請兵等情又據駐劄新寧總兵段燧然報稱初四日據家
丁往黃龍調兵見鄉民紛紛上山云口口馬騎千餘初三
日已抵木山舖又據滇營前協鎮張拱濟報稱口口復衝
武岡扎兵爛木橋等情又據東安總兵周尙禮報稱有故
鎮陶仰用標將王林芳在衡州走出至營報云恭王之來

果眞又有線偏院王猗子先已拏問爲失守城池今放出
來永戴罪恢取線偏院今在衡州王猗子上永城木瓜舖
已有□□坐塘等情又據副將朱朝望報稱□□恭王與
烏金王會議船隻一概上衡州等情初九日又據署鎮涂
邦偉報稱衡州恭王發兵數千往寶慶欲帶馬騎五千來
永等情十一日又據興寧侯胡一青寄勦臣趙印選書云
高溪司到□馬兵五百步兵二千祁陽到馬騎五百步兵
二千有奇恭□實抵衡州指揮水陸諸路并進觀此光景
必又大來衝突弟初以永祁遺孽不難勦除豈意恭□又
帶生□復來而馬養麟李一魁等各擁兵無故先退搖動
人心當地方平靜之日遍行騷擾一聞□息俱望風而奔
此等鎮將兵馬豈不大誤封疆乞仁兄卽密商之瞿老師

速催焦營下全曹營出永并望書達堵老師移檄馬王劉
牛諸公自寶武靖沉而下使其彼此牽掣不得大肆橫擾
□雖狂逞庶無他慮矣弟的擇初十下永誓與□決一大
仗大路萬無足憂但恐小徑甚費經營昨接中鎮一報云
□□數百在底坪搭造浮橋彼地左可通奉天右可通白
牙出永上可通出新寧□□計未知前往何處則防守
甚不可緩也等情各報到臣該臣看得□□齊集衡永今
幸滇師迅發勳臣一青於初十日領兵親往臣又累促勳
臣志建發兵夾攻據云滇師朝出彼可暮至而馬鄂國新
恢武攸其氣甚銳部臣毛壽登定十八日出武往會臣請
特頒御犒用示鼓舞若得長驅寶慶逕下衡長此則臣之
所跂望而未敢預必者也其諸勳戰守情形尙容續報爲

此具本奏聞

永歷三年十二月初四日具奏奉聖旨覽奏衡永□□
□□卿飛檄各勦合力進勦以戰爲守具見方略朕知道了該部知道

言官直氣宜伸疏

奏爲言官直氣宜伸聖度轉圜爲美特請賜環之典以協輿論之公事我皇上御極三年矣言官之蒙恩賜環者如童琳毛壽登輩可屈指而數也至於例轉雖有一定之憲規而邇年尙無舉行之實事近見廣西道監察御史楊鍾不知何事而例轉廣西按察司僉事臣初見邸報殊爲愕然當今言路宏開臺員濟濟或爲公論不與而掛彈章或以本末未明而來指摘或一時殿爭而仍歸和氣或偶然

穴闔而旋釋猜嫌其可充年例之選者當不乏人何獨於鍾而遂應例處也臣之識鍾也在丁亥之十二月臣見其與故樞臣蕭琦同鄉而絕不依附之與南安勳臣郝永忠交往而終不阿比之臣卽已深器其人比見其奏疏侃侃直陳不避權貴頗多言人所不敢言者私見臺班有如此之人真不媿哉哉鷹冠矣而不圖外轉之例乃先自鍾開之豈以其職居言路不效寒蟬仗馬之習耶人臣何官不可自見內外大小莫非王臣況以七品侍從之臣而陞五品憲司之職原不爲不尊豈鍾有厭薄不屑之意但臣從朝廷愛情言官起見謂鍾原無罪狀頗有直聲使得還其原官尚可作如許敢言之氣此實有光聖德大治輿情之舉非臣一人之私卽憲臣亦當以臣言爲然者也臣昔備

位言官見先朝臺省諸臣其久蒞例轉之任而仍還原職者歷歷可數況鍾臬司之席尙未卽眞者乎如以外處之臺員未便遽還烏府鍾籍江西當年江事方殷從舊輔臣楊廷麟呼號義旅至今部曲猶存若特還之臺銜給以敕書關防遣往吉臨南贛等處聯絡提調俾之戮力于外則朝廷旣不失優容言官之體而封疆又可資捍禦一臂之力矣惟望聖鑒施行

永歷三年十二月初五日具奏奉聖旨該部卽與議覆
謝犒師疏

奏爲欽遵敕諭感謝聖恩謹報明頒發御犒數目并述全永近日情形仰慰聖懷事本月初九日司禮監臣沈加熙齎到敕諭一道皇帝敕諭督師雷守輔臣瞿式耜朕眷念

西陲屢驚風鶴全陽近地復被□□賴卿忠謨碩畫挽將
墮之器扶已覆之轅使桂林將危而復安幾亂而復定數
年來卿五保桂林矣古稱社稷之臣卿克當此朕念卿苦
心感諭漚臆推誠諸勳鎮臣毅然憤發共奠巖疆一德一
心同仇報國朕甚嘉尙今特命大監沈加熙齎銀十萬兩
犒各營守桂慨全之有功者卿其察收紀勛頒發且遍諭
諸將士朝廷之待忠義戮力之臣每加意優厚諸臣之報
朝廷亦當盡瘁圖功目今楚事亦孔棘矣諸臣若能掃全
陽之餘孽靖衡永之□□朕當破格酬庸以答勞勩卿鼓
勵諸勳鎮將卽日出師共圖克復務和衷相濟式好捐疑
袍澤克敦齊鑣敵愾外振國威內安兩粵在此一舉朕實
望之欽哉特敕欽此臣恭設香案叩頭開讀外一時文武

將吏歡呼動地謂皇上軫念封疆血戰之士洞燭兵多餉缺之苦前後接濟士飽馬騰尙方涓滴出自聖恩感激同仇勝勁兵十萬矣臣卽酌撥分給諸勦鎮銀九萬兩另冊報明外尙餘一萬兩畱貯臣處意欲經理鹽鑄二項少佐軍需容臣商確妥當一面舉行條議上請伏念臣本庸材又當暮齒膺茲重寄惟日夜以鼓勵諸勦恢疆□□爲務而粵西貧瘠之區兵訖□虐之後僅存子遺半載以來微臣赤手支持精枯力竭蒙聖慈遠鑒軫念臣苦特遣內臣齎解帑金匪特三軍感激思奮而微臣正當萬無設處之日得此接濟分給諸勦直如身受之矣臣謹具奏謝以聞

永歷三年十二月十九日具奏奉聖旨覽卿奏分發餉銀多寡維均三軍感激朕知道了餘貯爲鹽鑄之資以

佐軍需更徵籌畫至計該部知道

恢復常寧疏

奏爲飛報恢復常寧事本月二十五日準永國公曹志建塘報前事據稱本月二十一日巳時據總兵官歐正福王三才任大勝塘報報稱正福等遵奉方略進兵常寧地界相機進勦隨差心腹的富人剃髮裝扮徑入常寧城中偵探情形探得常寧□□數千盤踞以作衡□屏障正福等隨與副將李希師劉用楚羅洪等商議必先取常寧以孤衡□之勢便於長驅直搗商畫分佈已定卽督官兵進扎地名小界於十三日午時先督精兵三千夤夜取小路出藍田埋伏以截衡□渡河救援之兵又發李希師等官兵夤夜銜枚前進比及十四黎明俱齊抵常寧城下時□□

盡發馬步精口數千分門出敵自早至已我兵奮勇力載
用銃礮疊換舉放打死口口數百口口勢敗奔退入城一
時擁擠入城不及我兵奮口口口千餘生擒二百七十六
名餘口急開北門逃遁我兵隨後追襲時總兵官王三才
任大勝齊發伏兵前後夾攻口口八百餘級奪獲騾馬二
百九十一匹弓箭器械無算正福等隨發官兵搜勦一面
入城安撫百姓將救獲難婦五千二十三口出示令各親
屬認領寧家奪獲口關防三顆口委牌七張解赴轅門察
驗其生擒口口二百七十六名途遠不便起解俱已斬訖
所獲騾馬二百九十一匹遵依軍令給賞有功官兵以示
鼓勵所有恢復大捷理合飛報據此看得口口盤踞常寧
作衝祁之犄角蓄銳志逞正未有艾志建籌之已審是以

發歐鎮等密授方略爲夜襲蔡州之計一鼓而克常邑則衡口之右臂已斷衡城一克則永口進無所之退無所據所有恢復大捷理合塘報等因到臣該臣看得常寧之去衡也百里耳南去祁陽間道兩日可達常寧旣得則衡城之腰脇已斷刻刻有取衡之勢況衡永屬邑盡爲勳臣志建恢復口援旣斷口餉亦竭彼雖竭力死守而我之奇正並出翦其旁翼將不戰而有以屈之矣其有功各將歐正福等所當敕部從優議敘爲此具奏伏候敕旨

永歷三年十二月二十九日具奏奉聖旨卿奏常寧旣復衡口羽絕湖南諸郡可次第報恢復有功鎮將歐正福等宜從優議敘以鼓忠勇該部知道

表急公紳士疏

題爲特表勤事急公之紳士懇祈聖明錄敘以奠危疆以
鼓後効事臣惟今日之事兩京十三省其僅存者東西兩
粵耳而粵西九郡被□躪者幾無餘土獨桂平紳士尙多
保其髮膚樂有幹止然年來楚氛內逼師旅煩興與靈全
永之間陷沒不常戰守互用西之爲西蓋綦難矣況大兵
所聚餉饋維艱子婦輓輸終歲動動□殘兵虐梳篋相尋
廬舍鞠爲荆榛田里盡爲曠土今且十室而十空矣微臣
畱守數年每當兵屯□逼之時城市逃亡鄉間竄走各勸
之索米索餉刻不可遲稱貸無門徵催莫濟幸賴一二好
義急公之紳士奔走于頽垣敗屋赤日風雨中鼓舞勸輸
用資騰飽桂省之存豈盡師武之力哉然臣自守粵以來
從未爲地方人材一爲表章從未爲有功士紳一爲敘擢

此實臣心刺刺未安之事也而況乎諸臣大半起家科目才品儘堪錄用者其忍不爲之題敘乎謹將各紳士履歷才品應加銜應擢用者逐一臚列仰祈皇上敕部如臣所擬立行具覆以勵急公毋目爲尋常薦剡而置之高閣也

計開

兵部職方司主事陳經猷靈川縣舉人學探今古望重鄉邦閉戶讀書居然古人自待畱心經國卓爾當世名流立團以固一方樽俎有折衝之概□□以安百姓維桑誇保障之功見赴行在供職所當改授考選以備臺省之用者也

戶部陝西司主事王明汲平樂縣舉人品同金玉才裕風雲司李浙中夙著廉平之譽發光閭里絕無聞達之

求宏才允屬救時雅範真堪砥俗所當改陞禮部儀制司以資羽儀之用者也

原任臨江府推官俸秉澹臨桂縣舉人樸茂持躬謙和範俗明允素稱于江右恬修久著于家居指餉每佐良籌捐資絕無吝色所當擢授監軍僉事以竟其才者也
原任寶慶府邵陽縣考選知縣今題陞監軍僉事湯執中靈川縣舉人才猷敏練器度淵宏兩任棠陰華選矜厲乎清要五年梓里綢繆克贊夫兵戎見委催督儲胥不避勞怨所當優加風憲職銜以鼓勵事者也

原任廉州府通判陞雲南雲州知州劉振秀臨桂縣副榜準貢清以律身敏能酬世才情四應洵左右之咸宜膺力方剛正經營之餘裕投閒可惜理劇需人所當量

擢僉事卽置臣軍前効用者也

贊畫戶部主事趙嗣鼎臨桂縣舉人品重球琳文響龍虎杜門惟知誦讀時衡雅抱經綸倡好義之風勸輸心苦殫固圉之策團練功多所當實授戶部主事以試其才品者也

贊畫兵部司務孫萬芳臨桂縣舉人稜稜風骨井井經綸扞梓里而壯聲援一方保障急封疆而殫籌策三載賢勞共事日深酬庸宜亟所當陞授本部職方司主事以旌其前勩者也

監紀兵部司務莫吾鼎陽朔縣貢生博學多聞矯修自好當戎馬倥傯之日負笈相依值兵食交匱之時紆籌共佐所當實陞本部武庫司主事以酬其宣力者也

以上諸臣皆與臣共事巖疆稔知其才品不忍抑沒之總從封疆人才起見非敢博薦舉之名以開倖濫之門也惟皇上俯賜鑒察臣無任激切待命之至

永歷三年十二月二十九日具奏奉聖旨這奏薦陳經猷等八員好義急公請加錄用允屬封疆起見知道了該部卽與具覆

察奏謝國恩疏

題爲遵旨察奏事本月十五日準行在兵部咨爲慶遠行在咽喉乞敕能將以固封疆事準兵科抄出欽召行在兵部左侍郎實陞一級臣程源奏前事內開該臣繇黔入粵竊見慶遠一路四面皆苗一線羊腸關通滇黔楚蜀命脈賴總鎮都督同知謝國恩威攝漢夷恩威苗倖捐金養兵

練成一旅間有竊發卽行擊滅而思恩之覃朗富天河之李大受俱各畏威懷德率先來投東極泗神南抵黎靖國恩號令所及罔不聽指揮焉臣聞扼要衝而通血脈聯各省而收犄角封疆之大計也而若臣乃能一身任之有餘豈非近今之僅有者哉但地多溪洞處處叛服不常非隆以事宜則各鎮林立未見能資彈壓也伏乞皇上準掛平夷將軍印晉之官保以服獠獠以便調度其副總兵都督僉事羅廷用覃朗富或親臨賊巢招撫或躬殄叛黨元兇給之欽劄敕書以奏厥功亦聖恩之所不靳者也八月二十七日奉聖旨這奏慶遠一線羊腸關通數省所舉謝國恩素有威名請給敕印加官保并羅廷用覃朗富敕劄該察覈議覆欽此欽遵抄出到部該本部看得慶遠一帶數

省咽喉所係命脈攸關控茲要衝非威望素著之臣未堪
資其彈壓鎮臣謝國恩望重苗夷功多捍禦思恩天河以
及泗神黎靖諸土感其德威所播罔不振攝而信孚焉若
而臣者相應隆以事權準掛真夷將軍印加太子少保給
之敕書其副總兵羅廷用覃朗富量給欽劄俟功成乃頒
敕慰勞未晚也具覆于九月二十七日奉聖旨這慶遠天
河等處地方俱屬廣西管轄謝國恩羅廷用覃朗富等著
咨行督輔察明原銜具奏定奪欽此欽遵備咨前來煩照
明旨內事理察奏施行等因到臣爲照柳慶俱屬廣西等
轄凡有功罪應聽畱守撫按核實題請乃邇來各郡土弁
紛紛陳乞其往來彼地使客亦多濫請市恩卽有真正勞
績反無繇自見如慶遠總兵謝國恩者臣實不知其原官

何銜授自何年月日據樞臣程源疏薦謂本官威攝漢夷恩感苗仲請恩掛印以服獠獠在樞臣不過從地方起見非有私心但察柳慶二屬總兵未有掛印之官如懷遠總兵曹應元余啟泰等力堵黎靖功績未旌今突爲國恩掛印明事權過重撫按不能節制相應實授都督同知給以敕書關防俾之分鎮其羅廷用覃朗富等合應照部原議量給欽劄以酬其勞績者也爲此具題請旨

永歷三年十二月二十九日奉聖旨權不宜輕假庶撫按便於節制覽卿奏知道了謝國恩著以原銜實授都督同知給之敕防羅廷用覃朗富量給欽劄俟功成頒敕獎勞該部知道

舉程源經理黔蜀疏

奏爲黔蜀經理宜急特請簡用才望大臣以恢西北之疆
圍以成一統之大業事切照天下大勢秦蜀處實上游年
來中原□患三秦久被□□獨全川失而再恢地廣兵強
戰守有據乃聞以兵多民寡米貴兵饑致□□乘虛全川
再壞近報秦□已躡重慶則省會且罹□□矣無蜀何以
有秦無秦蜀何以有楚豫目下經理之法自宜簡用封疆
輕熟之才以爲料理秦蜀之用此刻不可遲者竊見經理
兵部左侍郎程源久事蜀黔恢勦著績凡彼中地利軍機
人情敵勢籌之最熟以四應之長材備維桑之至計知必
有精審于先後虛實之間者近讀邸抄見源入覲行在臣
謂如源之才自應仍用之封疆辦理秦蜀徐規豫楚若置
之班聯之上則甚可惜也臣憂心疆事竊計今日恢復之

策不得規近功而忘遠圖若繇西蜀以定三秦正建瓴之勢也伏乞皇上俯察臣言敕下廷議優以事權崇以銜秩俾之奉命而往知必有報我皇上而早奏一統之大業者伏候聖斷施行臣無任悚息待命之至

永歷三年十二月二十九日奉聖旨覽卿奏黔蜀經理宜急請簡才望大臣具見切念時艱以人事君之大義程源猷績久著應優加事權該部卽與具覆

請給標將敕印疏

題爲標將勞績久著懇給敕印以示鼓舞事竊臣奉命督師例有中軍坐營標鎮等員臣畱守三年口騎數至城下諸臣隨臣盡心竭力登陴捍禦勤苦足嘉而臣未嘗一爲丐恩者亦謂斬將搃旗之士鼓勵在所當先而名器不可

濫邀尤當自臣標始也察臣標掛印者止中軍林應昌一員向因粵東未復特命之恢復東省故掛平粵將軍之印今年春臣咨送勳臣焦璉軍前令其圖功報効此外未嘗汎及一人也然如臣標坐營錦衣衛堂上僉書左軍都督府都督同知徐高自乙酉年隨臣入粵艱難險阻無不備嘗臣見其志在恢復疆土無全口捐資募士迎扈著勞兩年來楚口內逼頻突會城高經營戰守謀勇兼資元年五月之變高乘堞防守發礮擊口輿論偉之客歲郝兵罄劫婁子鵠衣高猶復稱貸多金招募健卒以爲圍護之用此眞實心做事之人兜鍪中所不多見者又臣標總兵官都督僉事戚良勳胸有甲兵師嚴紀律安營結陣沈毅多謀向隨故輔臣路振飛振飛深愛重之臣昨冬令其募兵守禦

今春給有敕防數月以來約束兵丁勤加訓練屹然自成
一旅而循謹謙和毫無妄動廩俸不給恬然自甘相應卽
陞都督同知同高一體議敘者也察舊督臣何騰蛟制臣
堵胤錫坐營標鎮蒙恩掛印者甚多臣又何敢妄請以開
冒濫之誚但兩臣周旋日久勞績頗彰且今各營掛印紛
紛兩臣未免生不平之歎用敢據實控陳伏乞敕部議覆
準與掛印庶勞臣感激而報効益殷矣爲此具本謹題請
旨

永歷三年十二月二十九日奉聖旨卿標將徐高戚良
勳戰守著勞訓練有方所請掛印著卽與議覆該部知
道

救劉湘客等五臣疏

奏爲中朝之舉動一新微臣之憂懼并集敢不避霆怒直
佈血忱仰祈鑒察事臣聞邸報見戶部侍郎吳貞毓禮部
侍郎郭子奇兵部侍郎萬翱程源吏科左給事中張孝起
禮科右給事中李用楫江西道監察御史朱士鯤等十四
員連名疏參詹事府掌府事禮部侍郎劉湘容都察院左
都御史袁彭年吏科都給事中丁時魁戶科右給事中蒙
正發工科左給事中金堡把持朝政罔上行私罪當死奉
旨著錦衣衛鞫問臣讀之未竟驚訝不知所云從來朝廷
處一言官建一大臣必果爲國法所不容輿情所共殯者
下之廷議方行處分而廷議必以宰相爲主今之廷議何
人乎止一輔臣起恆而起恆先在彈射之中矣至微臣則
羈身畱守遠隔東西既不敢遙執朝權亦無從與參末議

在廷方以臣必黨護諸臣肯容臣先聞而後發乎以臣揆之公論之人卽參疏之人也而懲懲皇上行法之人卽與參疏之人打成一片者也就使諸臣而果罪狀昭彰一如疏中所指處分豈無時日而汲汲爲此朝不待夕之舉動又且不先不後恰當勳臣邦傳到梧之時能無我雖不殺伯仁之疑否所處五臣平日或爲皇上持風紀或爲皇上資啟沃或爲皇上爭是非其生平品格久已難逃聖鑒果有不可追之辜何不予駐驂端州時卽震霆威大延廣衆之中暴其罪狀而優容含忍至今當文武播遷之日行錯枉懲奸之典使此舉而果非出聖意也則參疏諸臣有從川黔至者有從西江至者有新經考選者有平日在廷彼此抨擊者其知五臣必不如皇上知五臣之悉至公而至

虛也然則諸臣此舉直借皇上以行其報復之私而又巧
乘皇上之蹕梧慶國之來朝爲迅雷不及掩耳之謀以斷
其救援之路且諸臣驅除異已驟驟漸及于臣以臣與五
臣夙稱莫逆每朝政皆得相商殺五臣卽所以殺臣去五
臣卽所以去臣臣旣爲黨魁不殺臣不止臣今日且不知
死所尙敢以危疑之身爲皇上奏慨疆之烈哉伏祈皇上
暫息雷霆將原參疏發下廷臣公議虛實立見曲直自明
臣爲皇上親舊老臣在今日固知言不見信然狗馬愚忠
誼難緘默敢不避嫌怨仰瀆宸聰臣不勝激切待命之至

永歷四年二月初七日具奏奉聖旨

再救五臣疏

奏爲刑賞定一時之案是非垂千載之公再竭愚衷仰祈

鑒察事夫人臣立心之邪正不過從爲公爲私而分向者
五臣連章累牘嘵嘵執奏者爲公乎爲私乎夫五臣之所
以得禍自有本末臣且不必代爲剖辨然五臣之心卽不
見諒于廷臣不見信于皇上而未始不可以對二祖列宗
之靈也五臣兩年來之章奏現在御前不過以議論太刻
執持太過鋒鋷太銳致來異己之憎然旣不爲祖宗之罪
人卽未嘗不爲皇上之諍子今日正當上法求賢若渴從
諫如流之芳軌有臣如此崇獎之護持之不遑其忍輕加
摧折乎古之忠臣伏蒲攀轅以死力爭致爲主者多有不
堪受之光景然畢竟量其無他寬其戇直千古以爲美談
今五臣不避嫌怨不畏雷霆煩言激聒正不敢以中主待
皇上而以聖主期皇上豈意皇上不以忠臣待五臣而以

奸臣目五臣夫人主無威福卽以千秋之是非爲威福人主無喜怒卽以匹夫之好惡爲喜怒今皇上之威福果操于一人之獨斷耶抑以廷臣之愛憎爲威福也皇上之喜怒果協于斯民之直道耶抑以廷臣之忤合爲喜怒也今日廷臣糾參五臣方以爲鋤奸快舉臣若從而申救之是真黨奸也是好人之所惡拂人之性者也第樵牧不廢公論婦孺亦有良心如坐五臣以結黨行私公行賄賂恐鬼神難欺彼囹圄榜掠之下諸臣肯甘心受此惡名否卽當日威廟之英斷操切而十七年中亦未有漫處諫臣之事間有封疆失事被誅者非邊督卽邊撫未聞風憲侍從之臣而坐以啟釁封疆之罪者也若以媚東誤國爲題試問向者舉用杜永和羅成耀等未必盡出五臣也事先則未

見諸臣力爭事後則偏欲五臣受過寧足以服天下人之心乎況東粵必不可棄卽不戒而南韶失守猶望東勦鎮努力以冀桑榆之收以雪會稽之恥先以媚東二字爲驅除鋤翦之方是用以攝東勦鎮之魄乎抑用以激東勦鎮之勇乎臣恐氣未作而心已灰此等激將之法未必能收敵愾之功也至於今日朝廷所恃者忠貞營耳忠貞奉援楚恆江之命兩載于茲自督輔臣騰蛟在時已逗遛不進今慶國勦臣邦傳之力遂能必其悉甲破口乎況忠貞與東勦必不相睦未得破口之功先開內地之釁東之爲東竟不可知矣端州爲皇上發祥之地忍棄而不顧乎且東失則西孤又萬分不容不兼顧者乎從朝局而計及封疆此老臣所日夜寢食不寧鯁鯁憂慮者敢并饒舌瀆奏而

刑賞是非又其後焉者也伏祈聖鑒裁奪臣不勝激切惶
恐之至

永歷四年二月十三日具奏奉聖旨

三救五臣疏

奏爲未奏中興之績先傳殺諫之名聖德有虧臣罪當死
謹席藁行間速賜斧鉞事頃臣接戶部尙書吳貞毓等公
書一封抄揭一件讀之知五臣之積毒蓋至今日而發也
已而聞四臣廷杖矣追賊矣作齋奏差員自梧來者傳金
保受刑獨慘命已在旦夕矣臣仰天長號曰天平何不佑
忠良至此極乎臣考祖宗朝未有一日而廷杖三諫官者
更未有經筵大臣而受杖于闕庭者今皇上于艱難草昧
之時行祖宗朝未行之法遠邇爲之駭聽士類無不寒心

至于追賊之令止撫按行之于貪官污吏從未聞朝堂之上講幄侍從之臣而行此者熹廟時逆璫用以羅織善類誣陷忠良楊左周魏諸臣考死詔獄者纍纍此千載僅見之事豈以皇上仁明英哲之主而踵往事之覆轍乎臣猶記元年皇上駐蹕全陽時亦曾有一日而逮四臣之事聞係逆臣構陷然卽因劉承胤申救得邀轉圜今四臣中之劉湘客猶是當年四臣中之一人也昔年一承胤申救遂得轉圜今日輔臣起恆偕臣力救而終不能免豈非四臣遭逢之不幸耶若以乘輿播遷追咎五臣則當丙戌十二月亦曾以口逼羊城從肇慶移蹕梧州矣丁亥二月亦曾以口逼昭潭從桂林移蹕全陽矣八月亦曾以口突武攸從奉天移蹕龍城矣戊子二月亦曾以口逼嚴關郝逆劫

駕從桂林移蹕南寧矣幾番誤國之罪凡朝中侍從操議
論之臣皆當追究何得概寬況兩年來端州扈從印累累
而綬若若乃以推原禍始獨責五臣臣尤所不解也先儒
有言曰公論國之元氣夫公論與元氣何關蓋公論乃天
地之正氣正氣伸則元氣振也今諸臣爭紀綱爭名器于
元氣衰弱之時而急施扶補乃皇上于元氣未復之日而
先行鏟削從此正人皆思裹足賢士不敢褰裳爲皇上扶
元氣者少矣臣身肩疆事朝事可不與聞然忝列綸扉君
德之成敗卽臣之責聖政之疵善卽臣之事目擊此等舉
動而不能挽回他年史臣執簡而書某年廷杖諫官某某
幾人追贓若干某爲輔臣臣又何辭以謝負國之罪哉伏
乞皇上將臣先賜罷斥別簡才望大臣任督師振勦之事

容臣畱此殘骸庶可稍寬清議老臣愚戇語多冒昧并祈
皇上鑒宥施行臣不勝悚息待命之至

永歷四年二月二十一日具奏奉聖旨

引咎乞罷疏

奏爲臣罪日深臣病日劇仰祈皇上亟賜罷斥事竊臣身
請畱守桂林歷已四更不能爲皇上恢疆復土臣罪一也
旣叨畱守則民生卽臣撫綏錢糧卽臣調度乃哀鴻遍野
冷突無烟吾民日見凋殘而曾不能禁戢擾民之兵又不
能設處糗糧以資騰飽那御營上供不已又乞靈于東省
之接濟臣罪二也楚滇粵諸勳林立鼎峙臣不能調和主
客俾同心敵愾而人懷畛域外合中離致大舉逡巡坐失
時會臣罪三也地方官內有銓衡外有撫按臣每以爲地

擇人因人配地便宜題補至懷才挾技思欲自見臣憐才
心熱輒不禁啟事臣罪四也身任封疆原不應妄干朝事
忝居綸席朝政之得失又理得與聞乃門戶岐分元黃角
立而威不能壓衆望不能服人德不足化人虛竊綸扉之
號浮沉軍旅之中臣罪五也身爲政府東西之事皆其事
乃局守一隅皇上所付託邊疆之勦鎮其堪與否皆不與
知知之而不能早爲駁正更置致邊備廢弛口口日熾乘
輿播遷兩宮飄泊臣罪六也官府之隙漸開文武之嫌已
著臣不能正告之當宁消患于未萌直至醞釀發作使皇
上于鑾輿播越水殿飄搖薪膽共勵之時一日而逮兩大
臣杖三諫官爲祖宗朝所罕有之事臣罪七也臣以瘡痍
遍體之人且值衰殘多病之日內無補于揆席外以誤于

巖疆若不早自引退別請賢才將來覆餗債轅仰負高天
厚地臣雖鞠躬盡瘁終何救于艱危之萬一爾時皇上卽
欲宥臣之愆寬臣之責恐不能也伏乞皇上亟賜罷斥速
敕在廷會推才望重臣畀以楚粵督師之任至于臣畱守
之事已畢毋庸再請接任容臣解組閒居少事藥餌倘畱
此奄奄一息日後終得還鄉是皇上曲施帷蓋之仁臣實
永戴天地之德矣臣不勝悚仄待命之至

永歷四年三月

日具奏奉聖旨卿公忠元輔朕倚

毗方深何嫌何疑遽爾引咎求罷積勞偶疾尤切朕慮
今永□□正逼西陲砥柱惟卿是賴封疆任重卿其善
自珍攝終奏膚功卽日專敕宣布朕意該部知道

爲孫辭館職疏

奏爲資格有祖制可循清華非任子可列謹瀝誠控辭伏
乞皇上速收新命以肅官常以安愚分事臣讀邸報見六
月初二日行在吏部一本爲覆旨事五月初六日內閣傳
出聖諭論吏部瞿昌文召對稱旨著從優加恩該部知道
查瞿昌文現任中書科中書舍人應改授翰林院簡討奉
聖旨是依擬用捧讀之下不勝惶懼念臣孫以黃口豎子
章句淺淺且習而未諳朝常國典耳目從未經識父師曾
未訓教卽中書一官職司簪筆備員禁近猶恐弗勝厥任
而況濫厠詞員居然木天之席乎按祖制中式舉人自釋
褐傳臚後賜一甲三名進士及第授修譌編修其二甲三
甲簡品望素著文行兼優者考授庶吉士教習編纂之材
養成公輔之器三年散館後分授編修簡討百司庶府望

若登仙卽威廟朝考選行取推知改授詞林以循卓既著
于臨民獻替必優于導主敷歷中外廣求民瘼也安可使
弱劣書生方叨恩廕旋拔清華者乎夫任子一途凡係閣
臣考滿加恩者例授中書舍人首轉遇特典則授尚寶司
司丞久任最績歷升本司少卿正卿太常寺卿三品服俸
而止若翰苑一席三百年來所不經見之事臣敢妄僭受
之耶臣待罪綸扉兩番畱守爲皇上奏恢疆雪恥之績日
欲皇上慎名器肅紀綱他日光復兩都薄海臣民拜舞歡
呼者惟此祖宗舊德而已而微臣之勤勤懇懇請皇上恪
守者亦惟此祖宗舊制而已願使十四朝之令甲資格一
旦壞之自臣天下後世其謂臣何卽近日同官朱天麟子
宿垣以明經職列臺班臣謂其父居政地子居言路有乖

國體不顧情而特疏糾之蓋翰銓科道四衙門清要之官皆非政府子弟所宜居寧臣處僚友之子則明處已之孫則暗耶抑皇上或以現在詹事府詹事張同敞翰林院侍讀何文瑞俱以任子起家有例可引耶二臣係思文朝破格擢用原非政體且文瑞父勳輔騰蛟再造鴻烈上媲高密汾陽今且殉節星沙特予王爵豈臣之譏劣所敢疑其萬一同敞佩先帝牙牌受密諭調滇兵勒王萬里驅馳指畫方略其文章華采更兩榜中所罕見者又豈臣孫一孺子可望其步趨哉臣非不知皇上念臣犬馬微勞優異臣孫以示寵眷如官守何如名器何如典制何如士論何至臣之樸忠夙矢謙退爲心久在皇上鑒格之中不敢贅瀆伏乞皇上敕下吏部臣孫昌文改去翰簡新銜仍以中書

舍人供事左右臣亦得稍舒跼踖悉心疆場謹冒昧瀝誠
控辭伏候鑒裁施行臣不勝悚慄待命之至

永歷四年七月

日具奏奉聖旨卿孫昌文省親

至孝召對詳明詞員朕特簡用以覘鴻材不準辭該衙
門知道

再爲孫辭館職疏

奏爲聖恩無已臣罪難容謹再瀝血忱仰祈皇上曲賜鑒
原速收成命事臣于六月某日具資格有祖制可循一疏
爲臣孫昌文辭簡討新銜無非欲皇上不廢祖宗成法使
微臣不失謙退初心豈敢過違寵命以博名高耶奉旨不
準辭臣懼滋深臣心益苦而臣之罪尚可追耶昔臣祖景
淳登嘉靖甲辰榜第一廷試一甲第二賜進士及第與先

臣王鏊唐順之等雅負文苑聲望可以坐致台鼎臣祖兢
兢退讓凡經筵史局俱讓之同官故服勤二十六年位不
過少宗伯臣父汝說登辛丑二甲進士幼負時譽門蔭清
華庶常一席士論歸焉臣父以祖母殷夫人年老給假南
還不願列考終養後授資水部臣祖父以此訓臣臣顧不
自訓以訓子孫耶臣四載以來被寵稠至而臣自皇上登
極郊祀徽號二次覃恩循例祇受外其勲蔭公孤屢疏控
辭具在御前今使臣孫忝竊非分是臣之愛其孫異于臣
之愛其身矣臣身不可愛臣敢不上愛其祖父乎且臣長
子元錫舉壬午鄉試中癸未副榜祇緣國破家亡柴桑伏
匿未易青紫猶然一介寒儒乃使其子先翺翔于金馬玉
堂之上臣孫雖少不更事當亦有惄然不安者矣臣前疏

所列者國之法紀茲疏所陳者家之典型並未一毫矯飾並無一字虛僞伏乞皇上宥臣罪鑒臣愚速敕該部立改臣孫新銜俾得安心供職臣一家存歿俱拜生成于無既矣臣不勝戰慄悚息之至

永歷四年八月

日具奏奉聖旨卿祖孫濟美世

掌絲綸朕心倚賴昌文著速赴供職該衙門知道

臨難遺表

罪臣瞿式耜謹奏臣本書生未知軍旅自永歷元年謬膺畱守之寄拮据四載力盡心枯無如將悍兵驕動鎮諸臣惟以家室爲念言守言戰多屬虛文逼餉逼糧日無寧晷臣望不能彈壓才不能駕馭請督師而不應求允放而不從馴至今秋灼知事不可爲呼籲益力章凡數上而朝廷

漠然置之近十月十三日集衆會議按括懸賞方謂卽不能戰尙可以守忽于十一月初五之辰開國公趙印選傳興安塘報一紙知嚴關諸塔盡已掃去當卽飛催印選等星赴子營而印選躊躇不前臣竊訝之詎意其精神全注老營止辦移營一著午後臣遣人再偵之則已盡室而行并在城衛國公胡一青寧遠伯王永祚綏寧伯蒲繆武陵侯楊國棟寧武伯馬養麟各家老營俱去城中竟爲一空矣臣撫膺頓足曰朝廷以高爵餌此輩百姓以膏血養此輩今遂作如此散場乎至酉刻督臣張同儻從江東遙訊城中光景知城中已虛無人止畱守一人尙在遂泗水過江直入臣寓臣告之曰城存與存城亡與亡自丁亥三月已據一死吾今日得死所矣子非畱守可以無死盍去諸

同敞毅然正色曰死則俱死耳古人恥獨爲君子君獨不容我同殉乎卽于是夜明燈正襟而坐時臣之童僕散盡止一老兵尙在身旁夜雨淙淙遙見城外火光燭天滿城中寂無聲响坐至雞唱有守門兵入告臣曰

清兵已圍守各門矣天漸明臣與同敞曰吾二人死期近矣辰刻噪聲始至靖江府前再一刻直至臣寓臣與同敞危坐中堂屹不爲動忽數騎持弓腰刀突至臣前執臣與同敞而去臣語之曰吾等坐待一夕矣毋庸執遂與偕行時大雨如注臣與同敞從泥淖中蹣跚數時始到靖江府之後門時

清定南王孔有德已坐王府矣靖江父子亦以守國未曾出城業已移置別室不加害惟見甲仗如雲武士如林少

之引見定南臣等以必死之身不拜定南亦不强臣與同
敝立而語曰城已陷矣惟求速死夫復何言定南霽色溫
慰曰吾在湖南已知有畱守在城中吾至此卽知有兩公
不怕死而不去吾斷不殺忠臣何必求死甲申闖賊之變
大清國爲先帝復讎且葬祭成禮固人人所當感激者今
人事如此天意可知臣與同敝復語定南吾兩人昨日已
辦一死其不死于兵未至之前正以死於一室不若死于
大庭耳定南隨遣人安置一所臣等不薙髮亦不强只今
清兵已克平樂陽朔等處取梧柢旦晚間臣涕下霑襟仰
天長號曰吾君遂至此極乎當年擁戴一片初心惟以國
統絕繼之關繫乎一綫不揣力綿妄舉大事四載以來雖
未豈有寸功庶幾保全尺土豈知天意難窺人謀舛錯歲

復一歲竟至于斯卽寸磔臣身何足以蔽負君誤國之罪然纍纍諸勳躬受國恩敵未臨城望風逃遁大厦傾圯固非一木所能支也臣灑淚握筆具述初五至十四日以內情形仰瀆聖聽心痛如割血與淚俱惟願皇上勿生短見暫寬聖慮保護宸躬以全萬姓之生以畱一絲之緒至于臣等罪戾自知青史難逃惟有堅求一死以報皇上之隆恩以盡臣子之職分天地鬼神實鑒臨之臨表可勝嗚咽瞻仰之至

永歷四年十一月二十八日具奏

瞿忠宣公集卷六終

後學奉新張綬組校字

瞿忠宣公集卷七

耕石齋詩

恭聞大行皇帝詔噉泣爲詩六首

淪落陳人伏野田驚聞龍馭忽賓天三朝鼎革猶新主七載屯憂墜永年符瑞於昭空示象災祲屢降失承乾垂衣追想神皇世久道咸寧孰比肩

屈指光皇御極年三旬懿嬪不勝傳紀綱求舊嚴無伏絲繭維寬賦有鐫聖政自來靡變亂葵忠猶願誦忘愆如何忽降天心割惠澤徒看一詔懸

三殿經營數十年神皇休養待今竣輸將罄海羸涓滴驅董疑神省萬千拜舞聿觀臨御日烝黎奄忽痛號天小臣苦塊滄江上爭及瞻輝玉陛前

幾年東事罄金錢皮骨空支亦可憐捷伐已彰神武鏖捷
書頻至國憂滿河山世賞恩眞重帷幄元忠患獨肩何事
聖躬宵旰億宮車忽晏恨彌天

朝報年來懶去編每聞新政一欷然非關五位吹求細自
是同舟水火煎弛黨關門勤竚想含辛憑几共傷憐長安
奕子紛靡定國手何人一著先

風木銜悲已五年長安馬首尙迤邐孤忠未敢忘丹陛病
骨空餘枕碧泉鳳表莫窺雲日際龍胡應繞夢魂邊傷心
此日聞遺詔慚負君親泣昊天

先臣於九月辭世聞詔恰於九月故云

戊辰仲夏同仲雪仲達孫芳淨業觀蓮繼至者爲錢
抑之劉疎河徐元重蔡伯玉宋微之

長安雨後絕風塵出郭欣欣問水濱馬上遙看清鏡色溪

邊數指情粧人鱗香浮引荷香入肉吹輕兼爲吹勻勝地
佳朋容易集蓮方何惜到頻頻

笑殺攜尊問主賓看花聽鳥亦恂恂且將汎水澆塵煩慢
引香風入酒脣俗客不來花妬遠清談立對鳥情親頻傾
茗椀搖歌扇閒散風流味卻眞

己巳三月十九日過濟上遊古南池登太白樓有感
而作

勝地因人著遊踪曠代新兒童知李杜賓主各精神高閣

凌霄迴平池與郭鄰蒼茫收一望曉靄護深春

南池有垂楊覆水

屐到心先躍樓空貌轉親

樓有李杜遺像

風流餘几席樽酒泥光

塵殘碣千年在新碑片字珍

時人題咏豐碑林立守者錫以市遊人

逸情追

往昔韻事媿今人羈旅同心友天涯逐客身憑欄一俯仰

萬感集茲晨

次韻似孟陽

空山過雨倍幽深，長羨高人住密林。
澗戶尙縈書帶草，松窗遙識歲寒心。
平湖遠控千帆入，野釣偏宜獨客尋。
指點昔遊真似夢，此生何限去來今。

勝侶爲懽也及時，山靈亦自喜新知。
茶香入戶風先冷，墨妙生綃霧欲垂。
興劇每忘晨會改，譚深時復夜還遲。
漁佃舊約君應記，珍重雲蘿十載期。

叔維湖上歸適五十初度

門巷蕭蕭迥絕塵，青鞋素袷自鮮新。
詩成有盡堪忘老，業到無難敢厭貧。
隨意溪山千里客，暫時樽酒百年人。
秋來倒載知何處，碧笠荷筒瀉露銀。

辛未二月八日記事

梅花雪花雜亂飛頃刻春山失翠微不知晴光何處去頓
令百草埋芳菲新松高下各有意颺颺細響增寒威坡陀
曲折白更好逼勒桃杏銜紅肥乍如鬢髮滄浪叟愁與檀
頰相因依又如胡塵捲地至昂藏壯士撐重圍綠萼紅英
俱可惜風鬟雨鬢爭光輝亭亭老幹不記歲鼎然玉立高
崔嵬我來唁花花欲笑笑花應笑我時相違但說巡檐更秉
燭安知覓句忘添衣平生獨酌不盈盞此夕大斗縱橫揮
雙鶴舞罷忽長嘆似欲勸我公無歸羨汝長身宜露宿兼
之野性堪朝飢不分陰晴來伴汝庭前早有釣魚磯

菊月飲五畝居

山光罨畫入吾廬耐可幽人水竹居閉戶灌畦生計足看

雲出岫世情疎平蕪暝閣殘陽後霜葉春迴斷壑餘歲稔
牀頭新釀熟急呼小侍課佳蔬

素鷺平分到草廬溪光占斷是邨居橋通綠水山根活門
倚斜陽雲葉疎樵汲醉歸秋社散魚鳧響谷暝烟餘賦成
杞菊東籬晚隨分傾樽更撷蔬

心遠原知易結廬地偏何處不幽居烟嵐萬疊檐前積翠
藹千章竹外疎最是小橋看月上有時殘剎聽鐘餘人生
只合長如此何用浮雲易飯蔬

爲農先卜占田廬三載誅茅五畝居美好隨緣心易足交
知耐久性偏疎經霜籬豆香逾發食稻江鰲雪有餘硯礪
判隨卮酒盡羨君分餉足園蔬

寄贈海寧令朱元實

一雁南征秋滿蘋浙西仙令正稱循向來酒戶差豪否此
日詩筒共若論天姥峰高雲未散丹丘烟冷路爲塵知君
馴雉多清暇好與寒巖結淨因

詠素燈

明共琉璃潔共冰人間天上此清冷樽傾綠蟻光初泛坐
擁紅妝暈欲蒸映雪恍侵梅蕊白浮烟疑逗柳條青終宵
對此愁堪破何必虹橋駕玉輶

立夏日五畝居醉飲

纔離城市便清嘉況有園林勝倍加過雨怒生雙玉笋倚
風嬌映一闌花香凝霧幄愁添麝夢繞雲松可試茶賴是
主人能愛客儘教餅臥莫還家

永晝空梁燕語嘉新泥還向舊痕加寒輕麥隴平翻浪翠

重蕉屏淺壓花隔歲共傾霜後酒畱春初焙雨前茶風光
何處無人會勝賞應須讓作家

偃蹇青山入屋嘉池痕清漲亦平加春歸愴別枝頭烏夏
淺憐香雨後花採摘銀絲充美錯商量玉版點新茶他年
眞率尋懽會綠樹邨中第一家

坐擁琴書自寵嘉看朱成碧漸交加對門雲磬前朝寺覆
地紅茵昨日花不分徵歌頻中酒只應吸墨細論茶柴桑
栗里生涯在媿汝眞成處士家

甲戌春首兒童輩讀書東臯仲雪兄辱示雪夜記憶
之作因次原韻二首

經冬望斷是霜花發臘俄驚轉歲華似與彩毫爭素艷故
隨紺閣弄周遮人游瑤圃應同遠春入文瀾詎有涯惆悵

巡簷引索笑歸來和曲本慙已

王孫芳草乍盈庭玉屑霏霏復滿櫺並時霜毛浮積素萬
株寒嶺答遙青風翰競擲生花管雲磬時傳貝葉經想殺
麴塵烟柳動畫樓燈火兩三星

錢用弼誕日賦二十韻

世路方多梗人情或屢遷升沈非一態契分獨三年雞黍
開開局圖書靜結緣有花常共笑無月不同圓紉謫工觴
政雕搜盡物筌王孫猶故態公子正翩然灑落塵襟盡飛
騰禮數捐形骸渾脫略氣味久纏綿珂里原鄰比懸弧況
接聯自憐牽漢網番得許周旋燥濕音同律韋茲佩欲全
漸驚芳序轉已訝鬢絲玄生長看兒女過從記陌阡升堂
追戶闕顧曲儼神仙卜夜燒銀燭披懷接綺筵調冰吹素

爽饌玉失炎天放達邀朋侶差池恰後先從他鈎似曲未
抵濁爲賢超忽踰長算從容任化權此時惟宴合眞覺爲
君偏

送洪半石歸楚

使君昔日五馬來使君今日扁舟去拂拂清風夾道生絺
衣紈扇秋江曙尙憶分符出守時廟堂宵旰憂瘡痍善爲
鈎距豈民牧無乃臥沼眞吾師循循稱況出延陵里古昔寓
公皆信美勝事從頭舉大蘇新詩衝口廣短李似此東方
居上頭一官何處不風流每聞京國添西笑寧爲浮雲起
北愁古來循吏政多拙只保冰心同玉潔隻手遮天曾幾
時萬人有口終能說使君珍重爲行遲楚水吳山繞夢思
要知層疊轅轅意長似湘流曲折時

題周午陽先生小像

高堂五月生寒風誰拂絹素傳此翁短髮數莖吹鬢鬆雙
睛炯炯銜臙龐欲笑不笑聞虛空坐有人兮無是公瑤花
琪草香滿籠藉手眙目了角童化書一卷藏匣中紫微夜
夜纏蒼穹我欲致之明光宮判別天下操與融百鬼辟易
如飛蟲披心覲素歌堯封恐君一夕韜神功殿闕變化真
爲龍丹青寫照垂無窮持以護世兼護躬奎壁之間欣有
逢千年劍氣懸崆峒

嚴開宇所藏石田春遊圖上書三月一日與上巳日
二詩俱妙絕集中未載因次韻追和時丙子春日
也

閒中風味靜中諳照徹身心影共三時序漫憑花作歷襟

期私向鳥交談書叢索醉聊行樂病淺尋春尙不堪上壑
自應甘廢棄明朝山北與山南

臥病悠悠已半春園林簇簇幾番新凭欄舞絮渾如夢臨
鏡看花稍悟身老藉藥牀爲勝侶閑繙卷帙起同人風塵
瀕洞非吾事天與良時作逸民

嘉善錢御冷侍郎新參恭賦志喜

熙運維新日明良作合從禮緣求舊異寵較築沙重玉映
千齡鶴裳垂五色龍羣官陪舞蹈一德想聲容慰藉天顏
喜趨承廟略庸彤墀添氣象紫陌轉熙雍關塞形長固山
河物倍供彌天銷戰甲匝地務春農閭閻憑調燮衣冠慶
協恭萬方歌政本薄海慰朝宗緬憶絲綸地曾聞長樂鐘
卷阿深泮渙威鳳集階離日影花磚上香烟曉仗濃琳球

歸禹貢紅腐徧堯封蠢動微聞劇平安已報烽弄兵終自
戢躍冶漸歸鍛鍊石須神手紆籌借折衝鋒車纔遣發驛
路頓丰茸元氣崇朝霈甘露庶彙啁龍蛇爭偃息燕雀臥
高春早覺氛祲豁私沾露澤濃欣看魚水契宛接拜揚蹤
聖歷悠游永周禎五百逢懸知和鼎暇棋局未全慵

園中九日諸老徵詩余以先人諱日不能應命月既
望勉步原韻三首

十年舊隱憶柴扉遮酒看花韻總非
繪繖幾曾寬靜羽薜蘿猶未穩
初衣南冠就繫如縲至請室開籠當鶴歸何日
陽春回谷底野農無事曝晨暉

昔年曾此辱垣扉時事于今漸已非
多壘久知煩肝食同讐誰爲賦
無衣巖阿戢翼憐鳩聚中澤哀鳴盼雁歸
薄海

共瞻弘濟手諸君何以奉宸暉

圓扉悄靜勝巖扉斷絕人間是與非一室交知惟白墮三
時寒煖問青衣愁因書埽非關醉夢逐思生卻慙歸時菊
可憐盆盎裏幽花猶許傍春暉

次牧齋師韻

風鈴月杵慘朝昏咫尺真成萬里門黑獄偶然如幻夢青
山何日再收魂哦詩永夜渾忘寢點易寒窗若共論消盡
平生煩惱思身心調伏卽殊恩

園中見雪援筆志感

孟冬四月陰風栗慘慘同雲四望結高樹伶仃鳥不棲刮
面剝膚氣還噎寒窗障紙薄于紈黯淡孤燈半明滅擬將
白墮敵寒威把盞翻嫌酒戶劣夜深無寐柝音稀似聽窗

屏聲屑屑重衾布帳冷如冰展轉羈愁心欲折黎明童子
開戶視報道庭前盈尺雪咄哉天公胡變幻棘林一夜瑤
華發長安瑞雪儘堪誇此地將無助霜烈循數生平遇雪
時悲欣苦樂猶能說或凭棊几讀殘編或倚高樓望明月
或感松楸老淚流或踏郊梅同志挈或在山中擁被眠或
困長途策蹇蹙或煨榾柮守荆扉或戴貂冠趨北關壯心
逸韻今何往鐵圍寒冰儼夙孽人生境遇亦胡常天有寒
時還有熱冰炭炎涼轉瞬換但期長保凌寒節不見朝來
雲散日初暉堆瓊疊玉隨風掣

和劉簡齋韻二首

堪歎冥鴻一網收旋看夏葛又冬裘
羣臣已得安心法逐客翻懸去國愁
支厦棟梁誰可仗怡堂燕雀正羣啾
長安

棋局那須問羨殺莊生五石浮

風乾木落菊初收點簡行筭問敝裘每聽殘鐘如有悟閑
繡舊史卻生愁乘墉獨隼今安在失穴羣狐已亂啾閱世
總來成幻劫虛舟爭逐浪萍浮

送李蘅嶠

冥鴻君已振高翰此日爲臣良亦難流俗那堪雙白眼匡
時自許一心丹傳將諫草梧垣重歸去清風廬嶽寒多事
焦勞貽聖主可容白鹿久盤桓

送孫二如三十二韻

少小知名義清流想鳳麟深嗟高邑逝長憶老成淪繼起
看寧晉流風邁等倫千秋爭豎立六合荷陶甄績學窮墳
典擣辭逼漢秦生無溫飽志道視孔顏身明允聲偏卓清

通望益振人倫懸水鏡風月絕緣資拔滯欣連茹登庸埽
積薪千城維世道領袖快同人玉鉉需調急金甌啟夢頻
救時須國手支厦豈輪囷屈指推名碩彈冠慶秉均安危
知有仗朝野慰亨屯一字無心誤經年下理詢察淵昭主
略懲玩愒臣鄰功令何妨密微忠本自伸不才叨放廢千
載作遺民荷笠甘埋迹巖居懶問津瞻韓徒有願御李媿
無因何意離羅日翻成傾蓋辰高山仰止舊請室締交新
岳立風姿挺松喬節概岫雄談驚倒峽苦淚欲沾巾促膝
忘寒暑論心共夕晨詩篇可以怨體素不知貧臣罪無輕
重君恩總聖仁同憂交勉勗脫網尙逡巡古誼于今見孤
踪獨爾親天涯聯骨肉患難倍酸辛道義疎逾合心期久
更真暮雲春樹句千里各傷神

和牧師書事

電掣雷轟白日翻羅網吉網布乾坤是非終日昭青史曲
直知誰叩紫闥豈料離光窮鬼窟分明燭火照天門回思
枉構同文獄何不將心手自捫

戊寅初春憶臥雪亭梅花

梅花今歲復如何花下何人載酒過寂歷空亭飛白雪橫
斜素影漾清波苔荒不禁孤香發雀啁那堪減暈多媿我
閒人生別汝兩年索笑再蹉跎

短牆一曲水淪漣瘦玉疎瓊白悄然入案青山供靜對綠
溪綠篠助清妍幽芳原不因人熱好夢還將與鶴圓悵望
松楸纔咫尺月明環佩可僊僊

虞山之北小山東茆棘新開半畝宮一抹寒烟殊黯淡數

枝蒼鐵白玲瓏松風暗引疎香動竹雪橫侵小萼紅還憶
草堂西畔否憑闌聽鶴有髯公

江南一別便無梅盆盎生憎火熨開敢望衆香國裏住且
貪蝴蝶夢中回何當黛色侵妝額若處瓊姿勸酒杯願與
松筠盟歲晚山窗長伴古莓苔

詠梅呈牧師

孤根原自蘊真香柯斧相尋豈受傷烈日繁霜經苦戰搓
瓊笑玉吐春陽迎風桃李顏難駐耐雪松篁味轉長正恐
和羹需國手幽崖未許爲君藏

東臯寫景八首呈劉簡齋

春光到處躊躇遊人自入桃源莫問津柳綠風輕紫綠袂花
茵香軟蹴輕塵虹橋宛委隨波折翠黛空濛作意新勝地

天開看不厭願分魚鳥盡中身

休將春事闌芳菲淡冶風光世所稀四望平疇交遠翠每
臨高閣弄晴暉波融倒漾青螺動日麗浮烘綵鷁飛覽景
莫教忙裏過還看明月上漁磯

右春景

柳暗鶯深一草堂新篁脫粉映疎廊紅蕖冉冉風翻沼綠
刺蓼蓼雨插秧魚子初生聞跳躍鶴雛隨母試飛翔溪邊
正喜遊人靜且樂琴書與畫長

水闊雲多風亦涼
鳩來銷夏此溪塘
蟬嘶遠樹聲高下蛙
鬧平田說短長
雨過千邨新設色
花開十丈晴飛香
北窗初醒羲皇夢
起看芸夫正劇忙

右夏景

澄波如鏡月如銀
爽氣浮浮蕩夕晨
一抹青山空是色
滿隄黃葉靜無塵
香飄桂苑疑蟾近
露白蘋洲見鶴巡
只此

秋光難管領登高臨水倍愁人

空靈結構本天成洗盡鉛華秋更清儘有繁英供點綴偏
於色界見晶瑩旋風白鳥翩翩下映日丹楓的的明極目
平蕪烟暝闊接天遠水露初橫

右秋景

千株衰柳不成陰鴉噪平田雀噪林納稼邨農誇酒熟惜
花園叟護霜侵暄陽煖動凝冰薄皓月光流積水深黯澹
山容春意足疏籬梅萼又駸駸

雪後看山分外奇東臯況在水之涯蒼茫萬頃瑤臺迥的
爍千林玉樹披澄鏡卻疑鋪粉暗垂虹翻訝與冰漸扶筇
擁毳橋邊立惱殺人間老畫師

右冬景

東臯記勝

桃隄柳障

山水平開別樣粧，春風催送滿園芳。
夾隄繡簇千林曉，映日霞明五色光。
語燕啼鶯爭弄媚，舞衫歌扇暗流香。
桃源自昔人難到，何事偏來一國狂。

菊圃香城

東籬只在水雲鄉，花史栽培鎮日忙。
霜綻一朝鋪異錦，日烘千本燦流黃。
徘徊畦隴寒香逼，點綴林臯野趣長。
晚節莫追高士躅，繁英猶擬做柴桑。

野鶴鳴臯

仙禽只合縱天涯，想見坡翁放鶴時。
引頸但餘霄漢氣，梳翎偏喜雪霜姿。
數聲清唳穿雲破，半夜長鳴索和誰。
野性自然兼傲骨，冥鴻差許入羣窺。

修鱗躍浪

網罟無驚已

年孳生長養樂深淵天光雲影眞機在雨

色風聲得氣先

凡雨將至風欲來魚輒躍

掉尾千頭鱗族大跳波數頃

浪花圓陂塘自足江湖趣觀物閒評濠上篇

靜夜潮音

東臯水道福山潮

坡塘曲折水千條渺渺澄湖一望遙祇訝山容浮入浸寧

知海溼暗通潮六時鐘鼓聲遙接

先人構大士閣於臨水勝曰潮音

半夜

魚龍志欲驕登覽漫誇多勝事聞音遮莫更神搖

中流塔影

浮圖變現自神奇淨地偏多瑞影移每對一溪風靜後還

看四野霧收時層層倒挂澄波印歷歷孤明妙相窺寶篋

燭天還照水分明火樹湧蓮池

城中東塔寺常放塔燈昏夜月夜備極奇觀

竹林禪誦

花谿盡處絕游塵勝地原須結淨因
丈室香花空裏色六時梵唄靜中身
每當挈伴辜芳日閒訪枯團膜拜人
幻泡久諸無住相還依老衲作比鄰

茆舍村談

桃源雞犬別風光村落疎疎自一方
探節數時偕父老較晴量雨話農桑
簷日暖仍雛燕花鳴春深正夕陽
學稼幾年耽野趣田家真樂肯相忘

迴廊香霧

探奇選勝恣徜徉占斷風光是此廊
水面山容無定相花深柳暗細生香
烟迷窈窕忘歸路月轉空濛似曲房
斯夕斯晨何限意幾人到此不縈腸

別浦蒹葭

極目滄波正及秋鷺來鷗聚幾沙洲茫茫烟水連天白颯
颯霜風帶月愁老圃秋容仍澹艷隔溪漁唱自清幽分明
一幅瀟湘畫併入東臯佳麗收

春漲流紅

墜粉飄香滿鏡川鶯前絮後暮春天風光不逐春俱謝水
色還同花並妍每歎紅顏多薄命謾誇丹藥可長年驚心
物序頻更換閑對溪流一悵然

秋砧擣月

秋聲何處不關情子夜聞砧韻更清月白荒村燈已寂露
橫野水雁初鳴鄰舂隱隱遙相和促織淒淒苦自縈刀尺
漸催衣授早田家愁與塞垣并

雨窗觀稼

負郭猶餘二頃田，老農憂國但新年。汗萊手闢誰經始，蕉
蓼勤施我率先。漠漠平疇浮野翠，依依墟里濕炊烟。桔槔
無事貪天力，代食還歌擊壤篇。

烟艇垂綸

世路風波已徧嘗，閒看漁艇卽慈航。鷗鷺鵲鵲相依伴，葦
葦菰蒲足蓋藏。時倒醞餅供笑傲，偶拋竿餌詠滄浪。人間
不少逃虛地，杳靄冥濛水一方。

東臯諸勝自不勝，紀恨無絲筆長才。一描繪之旣成，
十四律又口占十六絕以足三十景。

西嶺雲生

秀色橫空水蕩摩，憑闌拄笏看青螺。英英飛去原成幻，卻
與巒容點綴多。

東樓月上

月印前溪未足奇，溪山初暝正堪思。
樓頭乍湧冰輪出，萬壑千林改面時。

虹橋醉月

空明萬頃接瑤京，對月飛觴肯覓停。
身入冰壺清沁骨，翻疑酒氣一時醒。

湛閣聽鶯

拂雲高柳暗藏鶯，百轉如簧貼意迎。
鳥性若還通說法，頻伽音裏證無生。

茜野浮觴

茜草鋪紅作錦茵，溪桃邨柳鬪鮮新。
狂歌醉舞春原上，惜殺花間拾翠人。

蓉溪泛棹

秋滿江皋興轉賒
凌波仙子抹輕霞
波心小棹頻來去
采采方知是鏡花

畫橋烟柳

拖藍遠水臥長虹
高柳交加曉霧籠
萬種春情烟靄內
六橋佳麗許誰同

紺閣香燈

萬頃玻璃浸碧天
燈光倒影入平川
熒熒一醒繁華夢
不數人間默照禪

雨沐郊林

旋看柳葉風翻白
瞥見山頭電閃紅
昏黑一天雷雨過
千邨佳氣鬱葱葱

波翻夕照

日落翻紅映遠天
林巒烘染霎時鮮
晴霞湧出千層浪
深淺胭脂漲一川

梧堤踏月

積水空明印一溪
步來方悟是長堤
梧陰滿地千花影
拾取秋心驚宿鳥

水檻乘涼

豁達長風度遠川
凌虛俯檻意茫然
天空夜色涼如水
坐看翻疑身在天

帶雨春耕

春雨如膏徧野田
邨邨蓑笠盡爭先
谿堂一幅河陽畫
不在屏邊在水邊

肅霜秋穫

田家作苦最堪憐我稼同時始信天
卮酒自笏還自樂團圓婦子一家圓

草堂觀畫

千緇萬帙展層軒極目雲烟滌悶煩
試把溪山爲印證誰真誰幻細評論

菊夜張燈

幽姿原不耐繁華何事高燒醉晚花
花影卻宜燈下看淡香輕暈度窗紗

東臯撮勝

天成位置絕形容何處移來卓筆峯
雉堞西城連北郭樓臺暮鼓及晨鍾
月搖水面流金粟雨過山腰界玉龍
柳外

憑高窮目望梅塘帆影更重重

獄中憶梅雜詠

一枝瘦玉已嫣然況復瓊株遶後園皓質欲欺宮粉艷瑤
光遠映月華鮮穠桃縹李香誰似翠竹蒼松品更妍羨殺
孤山林處士居然花裏一神仙

我亦山中一散仙栽花插柳讓誰先止因清福難消受坐
此幽愁了宿緣春色自浮雲樹外天香只在夢魂邊相思
一夜三千里恰似宵來返故園

梅椒一見便欣然破白舒紅眨眼間共指飛瓊花易散旋
看如豆子成圓莫愁麗景難消日正惜流光不駐年開落
尋常亦何預且尋老友伴高眠

一年花事總關情爭似寒英與夢清合眼時聞香襲襲披

帷如見月盈盈美人林下光相接高山中駕可迎還想
東籬搖落後歲寒惟爾愜幽盟

浮生汨汨盡空花何用流連感歲華覽鏡自嗟添白髮聽
歌猶想鬪紅牙清狂好事誰如我煩惱多愁莫過家病臥
寒窗無倚賴閑看紙上寫霜葩

山居何事最堪誇萬樹寒林盡放花積翠自來浮寶靨霏
英時復上窗紗東瞻月白搖疎影西嶺烟橫抹素霞神想
清游窮勝事此身何必怨天涯

余素不嫻於詩而最喜吟詩歸田多暇情境偶有所觸
或率意口占要以自適其天而已歲丁丑驟罹奇難幽
囚請室興味索然又不喜描寫園中苦況久已閣筆今
年春首疽發肩背楚痛幾不可忍枕上思及北山梅花

聊成數首因命童子錄之猶憶東臯景物殆不勝書中
夜呻吟每自擬一題輒占一首數日間不覺成帙因自
笑東臯名勝豈堪唐突要以病苦無聊中借以消遣仍
不過自適其天而已矣戊寅春分日記

己卯首春和牧師除夕元旦二詩

生來弧矢寄桑蓬荏苒流光半百中何事投林翻觸網敢
思破浪會乘風良辰勝侶爭浮綠小院閒庭數落紅從此
漁樵生計穩不勞岐路問西東

浮生空自歎飄蓬眨眼都拋役夢中攬鏡漸看梳裡雪閉
門一任耳邊風春來礪草添新碧雨後林花發舊紅竹屋
紙窗清事足閒攜菊種向籬東

勞勞回首總飛蓬萬事全輸高臥中莫計歷頭長短日試

看旗腳往來風家醅已報浮新綠溪夢時將放小紅差喜
白頭雲臥穩更無飛夢日華東

疊前韻一首示伯玉

憶從早歲誤桑蓬滅沒翻身濁浪中不是聯牀曾聽雨那
知倦翮苦衝風邊塵故鬼長埋碧香土騎人踏軟紅剩得
幾行憂國淚與君灑向畫橋東

己卯長至日山窗得梅口占是日爲十一月晦

衝寒策杖自尋芳應被南枝笑劇忙素艷不須明月夜凍
香先贈美人妝恰疑灰應吹散早便覺春從刺繡長不是
老夫耽野興相思只合谷中藏

庚辰歲二日牧師枉示除夕元旦詩次韻輒得十首
玉几朱衣只眼前雷驚電轉又三年休論逝景風中燭正

好安心浪裏船間左桃符爭改歲溪頭梅萼喜烘天閒來
竊比窮途老還似看囊少一錢

引拙何須更護前祇拚喫飯過殘年任教風雪還高枕但
覓烟波儘放船酒淥溶溶宜燕喜燈花緩緩報晴天春盤
細菜原如玉誰識支銷賣畫錢

春來恰在上元前物候芳菲倍往年燈火青熒雲臥宅烟
花牽逗冶遊船乍看菽麥催農事更訝風雷破臘天料得
東君自張主且將卜歲試金錢

煨芋團坐話燈前頭白逢春想少年綺陌看花金勒馬晴
川載酒木蘭船白經薄宦無多味差喜深山別有天便與
兒童相囑付埽花休更損苔錢

分付花前共酒前儘饒幽事過餘年把茆爲葢秋風屋乘

興依然春水船燕子銜泥尋舊壘魚苗唼水曬晴天東阡
西陌經過慣可費山翁種菜錢

侵晨喜鵲噪簷前老去惟祈大有年質視典衣聊過日浮
家泛宅豈須船卽聽布穀催春雨更喜眠蠶浴夏天多謝
流光從閨取天公不用賣花錢

蓬扉早掩十年前短髮續紛年復年逢竹便尋王子宅來
遊多是米家船同雲野店猶飛雪落日平岡欲漏天帶得
梅花香滿袖此中風月可須錢

春來暗約百花前遲日柴門度少年山寺雲蘿從倚杖水
邨烟柳繫行船安排勝事偏餘地收拾初心付老天應是
東風相愛惜溪橋釀綠動榆錢

燈殘霰集紙窗前自理身心自忖年投老濃情都似蠅浮

生浪跡恰如船未能齊物尋莊夢聊覓忘懷共葛天風月
況堪乘興在菟裘不用買山錢

玉茁孫雛坐膝前漸看犀角又添年衰門幸慰惟嘉種塵
世堪憐是快船杜曲自饒芳草地陶家別有菊花天窮通
早解勾除盡不欠君平賣卜錢

東臯次前韻

西山橫翠草堂前插柳栽桃不計年林際忽傳齋粥鼓水
邊時繫放生船跳魚怒躍風前浪語燕斜飛雨後天何似
庭中雙白鶴尋糧不費主人錢

到門童稚只爭前野老重思簞路年敗屋荒基無宿處斜
陽細雨趁歸船成羣繡陌人如月極目平疇草似天莫道
桃源容易入班荆沽酒試攤錢

春暉園次前韻

烟靄湖光几榻前此中一日抵長年數聲鄰磬來書枕十
里山塘過畫船茶作松風延夜月花迎人面笑晴天枝頭
樹底纔交付又見田田水面錢

輪囷老樹尙檐前風雨過從三十年戶納層峰雲挂席池
通活水屋爲船空山豈必人無分畏路方知我得天翦燭
西窗還記取粉牆蘿薜繡如錢

頂山次前韻

直北松楸在眼前山中寒盡那知年衝風自達尋梅屐冒
雪誰過載酒船鶴唳隔溪和露月雲烘孤嶼養花天迎春
送臘繁華事多少經營賃屋錢

齋心長向佛燈前回首知非又一年休爲登高思蠟屐莫

因訪戴問歸船松風瀉翠鳴泉壑梅月昏黃釀雪天老我
閉門燒楮袖蒲團坐處長苔錢

登茅山四首

皓魄春來第一宵仙關纔叩萬緣消微茫遠岫烟如織彷彿羣真駕可邀五夜香臺看奏籙隻身雲海聽吹簫憑闌
爲問今何世惟有姮娥伴寂寥

勝絕窮探徹夜闌雲璈月管佐霞飧松杉冥漠含秋氣環
珮虛無降夕壇掌露恍疑疑漢樹光風真欲泛崇蘭不知
勾漏緣何事猶有丹砂未了歡

永夜清游興轉饒頻呼茗飲當松醪空山厨館皆庭院小
豎笙簫亦部曹月滿鉤簾流綺席松吟磻戶滴瓊膏從來
幾得閒人在直欲追蹤比昔豪

神游仙界已多年此夕登臨慰夙緣風掃浮雲歸洞府月
移年夜散花天探奇翠嶺頻居後乘興芒鞋較獨前左拍
右攜非我事心香一炷要爭先

次韻西隱長老乞蘭詩

別花先別葉萬紫不及綠請看霜雪交幾樹能無禿猗猗
九畹姿藹藹愚公谷抽芳遜凡卉託蔭藉高木並紉湘臯
蕙擷秀秋風菊生來竟體香藉甚同心簇株株互相映葉
葉自成族悠然含露英茁哉當階玉沾被盡羣書深藏惟
古屋春榮了不挂秋至誰爲辱惟應滌檐庀早與營湯沐
蠲除沅澧思副慰人天欲何能同木魚頓頓隨僧粥未抵
參寥羹且伴與可竹

辛巳元日過歸雲莊探梅二首

閱盡風波老一丘萬緣皆夢覺何憂開軒冷岫閑雲過隱
几疎櫺野翠浮魚鳥共語幽興熟琴書偏合暮年謀芒鞋
策杖饒生計儘許披圖學臥遊

香雪圍攢五畝宮虛亭弘敞納遙峯莫憐鄧尉花無主差
喜羅浮夢可通拳石蒼松宜野性古芸秋竹共芳叢從今
自與心相約三友中間一老翁

除夕次韻

又將景美共辰良宿火新窮接曙光煖意暗歸村柳上冰
條斜發野梅香溪雲破臘偏凝黛無春岫浮煙闌曉粧終歲
閑愁消此夕燭花何事淚成行

元日次韻

休論攬勝與攀芳隨意松寥共竹房戶小偏宜諸昔酒心

閒作計答流光收書蓄畫消貧癖坐石看山類醒狂春色
從頭排日過溪花應笑爲誰忙

再疊除夕元旦韻

紙窗筆墨稍精良挂幅鵝溪白蠟光歲事且傾澆悶酒春
心聊托辟寒香擁爐對雪惟枯坐翦燭看花倩晚粧自忖
幽懷還自紀燈前小字細成行

多情梅柳報年芳樹樹扶疎繞曲房亞壁臨風偏有致繁
枝帶雪倍生光冰心自合山中冷春色何妨世外狂打點
漫銷閒歲月鈔詩讀史正堪忙

歲八日獨坐山莊率筆寫懷得二十韻

野性偏宜寂安居只守慵新年多暇日高興托幽蹤澗道
冰還阻巖阿翠欲重籃輿芳草合藜杖白雲從殘雪驕晴

黛柔風轉岸容到門調和鶴開戶納羣峰豁達閒舒眺蒼
茫倍倚筇莓苔隨意坐花藥應時供最是橫斜影能澆魂
磊胸凍香非旖旎素艷獨惺忪結夢原依蝶捎雲卽號龍
繞溪成曲折映石助玲瓏態淺微歌落姿寒著酒濃占春
何事早發臘倍情鍾索笑將誰共巡檐好寄淙清漪眠弱
柳側徑引穠茸拄笏延朝爽憑闌聽夕春蒼崖藏古剎暮
色報疎鍾畫理看山得詩情步履逢孤斟聊自勸鉤月正
懸松

毛遠齋過虞不克成主漫賦二律

檐前風雪正紛紛檐外梅花斷白雲準擬高朋來過我何
人清節類夫君淹留竟日誰佳侶羈旅殘年易夕矚回首
長安眞隔世只應樽酒細論文

彌天匝地盡張羅一室悠悠自寢哦不是楚才偏迂俗更
誰燕市慰狂歌寒知野鶴丰容少老覺青松意氣多徙倚
勳名來北極溪梅早已報晴和

梅下小集社中諸子孫子長首以新詩見貽舟次荆
溪依韻疊和五首

平橋曲水自成蹊宛轉房櫳過客迷凍壑故浮蒼靄徧寒
林真與白雲齊花清巧耐頻頻厄詩好應須續續題流想
新鶯求友日千章稠綠覆遙隄

最是閒居愛友僚況逢淑氣近花朝寒輕似放三分暝藥
冷那禁一片飄索笑正堪淹獨坐孤懷聊亦借人澆荷香
桂馥須臾事留剩家醅取次招

空亭突兀俯層巒勝侶追尋凭倚欄古幹自能衝雪過繁

花原合趁晴看羅浮彷彿非關夢鐵笛蒼茫不道寒領略
最饒雙鶴在每於風雨振高翰

誅茅荒圃遂成林薄有微棕尙不禁雪擁槎枒芳徑合烟
和籬落古苔深寒香會占韶華早疎影偏知遲暮心見說
冰姿自姑射但祈仙帚掃花陰

塵世難偷半月閒悠然朝夕見南山天寒籠袖深藏手晴
旭當窗早破顏隱几繙書從收取適攜鉏斷藥豈知還開門
埽逕延君後便與梅花共掩關

春游

岸容約略全含笑山意溟濛不耐藏晴氣烘人如中酒花
香沁口欲休糧歌裙舞袖誰家好溪籟村醪興自長九十
春光今又半除非一釵爲春償

贈凌茗柯赴東轄任

邊愁民瘼正焚然一疏捫心萬口傳縱欲盈庭同許國敢
辭禁掖獨憂天爐香立近沾濡久珮玉趨遲獻納偏可是
聖朝無闕事暫教清切寄旬宣

官舍眞成飲水清書龕猶傍印牀明心依蘭雪薰修密手
握韜鈴幹幹濟輕甘雨綬懷棲澤雁春風談笑折長鯨建牙
指日還吳會海岱先看洗甲兵

爲漢洲姜封翁六十雙壽

粵昔東萊郡鍾祥尙父孫大風迴故國喬木配高門有美
金閨彥傳家章掖存一經含棣萼雙璧照田園下食羣龍
聽安巢老鳳痕書帷勤灑掃塵閣薄寒暄樸學耽栖寂茅
衡慰悅敦犬迎劉寵吠草剝鄭玄翻雞黍招鄰局漁樵並

竹根樓臺看蜃市桑槩暗郊原紫誥排窠濕黃麻曜手溫
儒衣新績繡山酒舊醅渾賀燕重添舍遷鶯復囀村人知
稽古力家沐漢庭恩驥足齊鑣展鴈行接筵騫天厨傾玉
滿宮錦疊花蕃扶杖還分果扳輿更樹萱箕裘連海岱堂
構副乾坤報答三光寵皈依兩足尊晨昏猶扇枕共被細
尋論

承牧師命次孟陽唱和詩韻

拂却緇塵浣布袍山租水浹興偏豪壁藏天祿千秋秘樓
臥元龍百尺高命酒花間淹夜月論文石上沸秋濤風波
不到山中客時趁漁翁上小舸

初服依然一布袍歸歟何處不稱豪泉飛樹杪千重白風
起巖阿五月高載酒徵歌花拂坐開緇養紙雪生濤山翁

漁父還相識乘興時時命小舸

題戈莊樂藏硯贈其令嗣茂才

一片靈山石丘園再世珍質疑玄霧細潤薄翠烟勻霑霽
嘗疑雨黝顏不受塵紋均浮古繡鵲眼逗玄津試叩宮商
協同看黼黻陳受成何代遠標格李唐親風雅翻從變詩
騷慣助神誰先操郢曲知疊幾陽春豈欲韶園液來茲共
隱淪琴書稱洽契瓢飭結比隣束絹憑濡染雲箋從軼倫
竹床花靄暮蘭砌玉滋辰驥子趨庭過龍雛遶膝頻之無
徵夙穎文字種前因燕翼單門弱箕裘墜緒屯平生無長
物付畀當宗祿寶玉差堪並籙金慎莫論一朝弓冶寄萬
里羽毛新故事聊申述前賢尙可循長公曾賜過祖德本
從洵勉矣承堂構遐哉溯析薪書裾徒婉孌浣壁漫遺心

努力篝燈暇棲心籬落貧據摠窮理窟豁達貫天垠賦爲
蒼穹補書排列宿均羅文應晦迹毛穎早濡脣往往徃端溪
友英英觀國賓江鄉傳世舊經術閉門真龍躍雲霄路雞
鳴風雨晨休爲焚硯客顛倒磨墨人

義興同年友吳問卿再獲膏露醴泉之瑞遠近沸傳
名公作頌以余忝附蘭誼徵詩紀之愧未能也辛
巳夏日山居無事爰摭長句兼致禱私

纔說山頭甘露零又傳堦下醴泉生非關玉女澄潭近惟
見銅官早旭晴金薤萬株圓翠靄寒螿一碧墮雲沈涓涓
滲砌皆靈雨冉冉聯梢盡寶纓崖蜜麪塵松共偃瓊脂婉
嬋晝還繁漢家十二層霄上妃子芙蓉薄曉傾繞架牙籤
林塢癡小潭花嶼竹牀明甌添白乳浮香細酸注黃流拂

坐輕天澤向來原合氣高深此日恰雙清延年却老三危
冷飛瀑兼嫌萬級橫野老攀條爭採拾兒童懸綆候虛盈
鶴歸城郭菁葱倍鷺狎池塘荇藻縈定有藍橋要契濶故
隨仙掌並崢嶸和風貯潤瀾天灑德水含膏徧地迎爲問
貞符寧疊寵須知穹穆久垂精代從洛社儀刑古慶積東
朝羽翼成王謝貽謀憑後雋韋平沿業冠西京卽看白責
丘園美夙擅丹青彩鳳鳴試策驂驪同杏苑旋占筦輦浴
蘭英讓皇孫子神仙窟何限鍾祥造物情

中秋夕同宋爲谿顧孝柔蘇子后吳爾寧諸子東臯
看月席上次爲溪韻

秋月偏宜此夜長移筇徙屨漸迷芳將沉晚色看逾炯欲
睡山容忽改常玉塔臥來方浩蕩冰輪湧出轉微茫鄰鄰

水面波恒縹馥馥花心氣倍涼碎影簾櫳修竹冷飛光粉
壁弱雲翔追歡反覺年華近飲雋何須語笑莊宛轉清歌
風外落玲瓏低唱月中央天高正自思長嘯露下尤堪倒
急觴勝地高朋從爛熳姮娥今夕耐顛狂休因桂樹空尋
斧莫剪芙蓉更製裳蟾沒不愁侵北嶺鏡懸還許就西廂
舊醅未乏新醅續分付農家早築塲

贈王中訥再任福州兼寄懷曹履垣孫光甫兩使君
油幢綬蓋上頭居爲政風流盡不如夾路青山迎面笑經
霜紅相滯人裾棠陰露澤千家舊竹馬童兒十載餘臥治
何須重料理考亭曾有救荒書

蒿目瘡痍萬國前欣聞閩海淨風烟介夫圖繪其時矣伯
紀孤忠共勉旃此日徵黃真簡在他年召黜更誰先雲山

疊疊親知好飛夢嘗應列九仙

贈王煙客五十壽

要識匡王業須看奕葉昌
昭融逢景運綿邈際平康
啟沃垂貽燕絲綸紹肯堂
後先追幹濟作述溯巖廊
次第風雲合委蛇日月旁
致身從尙璽典樂暫司常
人物江東俊官聯北斗颺
望隆翻用晦秩峻轉周防
游息消閒日縑毫早擅場
營丘工點染送子極微茫
遂用丹青理通心雲水鄉
聲名中允並丘壑輞川藏
倡和資裴迪扳延擬鄭莊
虛窓羅典籍綺席倒壺觴
繞膝調騏驥賡鳴叶鳳凰
高山深蘊玉大國產名香
更喜懸弧日先開斫桂祥
公侯必復始定角又成行
早擅東平寵今延四世芳
西京韋氏盛唐代令公強
歲暮愁冰雪時艱念闔閭
非君重展布孰與慰痠瘡

祖武人皆有孫枝鮮克當傾心期邁會拭目覩朝翔孤癖
承通賞過從屢欲狂入林忻把臂移棹幾迴腸世附金蘭
譜交眞秋水長生成多壽骨談笑吐雄銚報主身難逸籌
邊鬢未蒼麒麟高閣在早晚盡明光

和李孟芳自壽詩

垂髫朋舊幾如初飲啄殘年敢望餘

杜用

山色入門看偃蹇

松風出語聽蕭疎

俱用蘇

一生傲岸眞烏有

李

六尺昂藏亦

子虛

陸

用拙從來須屏跡

杜

羨君未老便安居

是處隨身草木森故園同此百年心漸看柳線金垂縷遍
踏梅花玉滿簪回首不堪今昔夢調心聊作短長吟何人
似爾樓前樹傲雪梢雲上百尋

嘉平月連日大雪數年來所未有余從梁溪過荆谿

舟中紀事二首

九龍如掌玉塵飛一曉銅官失翠微
夾岸野梢爭抖擻投林寒鳥各因依
爐存宿火宜堅坐杯引孤斟半掩扉
遙想瞻雲花出滿南窗北嶺待人歸

瓊英千里徹寒輝竟日孤篷看夕霏
小戶羈愁聊把盞衰年稚子爲添衣
三更漏月清人寐一棹敲冰似葉飛
梅柳定應知勝賞不辭堅近報芳菲

壬午立春日

春同人日正春朝歲改風光獻歲饒
香勒梅坡泉未動泥融麥隴雪初消
金花巧耐看逾勝人白玉纖傳細自調春
但使豐登林臥聽百年眞欲老漁樵

閒居差自得閒權選勝隨方結勝緣
苔面漸閒冰釋後蘭

心欲放雪消前經行草色侵車軟

白傅春朝句

作伴梅花到酒

邊

蘇春朝句

却笑淒清少陵老瑤墀懷舊十餘年

杜人日

次牧師元日雪詩

準擬銷兵一挽河朝天彷彿聽鳴珂遙空早覺□□少上
瑞先占國慶多豹尾千門連紫塞龍驤萬斛迴滄波搓瓊
踏絮家家事誰奈春醪尙東何

次道開上人遊東臯見贈扇頭短歌

人生樂事難萬全寄托偶異殊天淵古來賢達鮮可紀前
有斜川後輞川雲歸一樣心能遠柳浪依然地共偏從他
塵務日填委獨我花藥長新鮮余家池館人人見到門別
自開幽禱偶然位置列穠纖共道生成能宛轉雨葉風花
隨地足樵歌牧唱時相屬客侶熙熙任寢訛主人自愛無

邊幅最是崦嵫煙景暮霞催月上分明處畫角聲聲報曉
來銀杯漱漱誰能去有時午夜看雲破徙倚簾櫳剛一箇
白紛猶自掛絺衣晴旭先思採花露始信閒中節序好風
塵碌碌人誰曉十年林臥久忘貧數莖白髮眞貽巧寄聲
野衲無多羨勁翮排霄始知倦息影山中細自論到頭天
下何人健溪邊樓畔任憑闌偷得浮生半日歡縱是鶯花
偏闕熱何如冰雪耐清寒我今已學天隨子烟月無邊誰
是主袈裟棋局許相從二老風流同稼圃

觀燈卽事二首

良宵偏合可憐人勝侶依然一室春花氣助情烘客醉月
痕隱約勸杯巡徵歌細按明珠串旋舞斜飄點絳辰誰道
六街燈火裡衰年於此置閒身

火樹兼於竹樹勻今年較比去年新風簾何用垂珠幌綺
榭惟堪坐璧人巧合鶯簧防竊聽偷分蟻綠最情親異時
記取開良譙花滿房權月滿茵

和吳爾寧隔窗紅梅二首

一株紅艷倚東牆笑日含霞不受霜羌笛忽吹庾嶺信漢
宮初改壽陽粧寒添酒暈扶冰質額點脂痕帶粉香羨殺
小樓春思滿憑闌有客自持觴

孤性從甘傍野墻濃姿偏自耐冰霜根栽別院添春思花
發高樓鬪曉粧雨濕臙脂珠欲滴風吹迷迭酒疑香清池
畱得殘紅在好共騷人數舉觴

再和紅梅二首

日斜和影度鄰墻祗覺幽姿解醉霜獨壓羣芳原有艷埽

除俗態自成妝春歸紙帳新添夢暈入紗窗暗遞香珍重
落紅還細數閒呼小史慢巡鶻

玉笛誰家過短牆一聲吹落月中霜冰壺忽映流霞色絳
蠟初矜薄醉粧雨過蝶鬚仍傅粉風來雞舌自含香陽春
未許輕酬和且向花神進一觴

咏月下紅梅再和爾寧韻

最愛紅英傍粉牆亭亭艷質立繁霜微酣隱約燈前態滑
茜依稀鏡裏粧臨水紋生嬌弄影隔窗風動暗飛香幽懷
詩思相催逼忍對佳人不舉觴

用謝樗仙所題畫首烟霞泉石古柏蒼松八字爲韻
侑壽九屏太翁端柱七表之祝

西江豪俊眞駢闐幾家載德開大年帝子危樓空萬牘半

山傑閣橫飛烟從來門第易衰歇惟有丘壑能牢堅今朝
剩澆椒花酒振筆高詠南山篇昔年學士蒞龍華漫擬河
陽滿院花莊靖衍齋尋舊雨襄貞宅畔吟晴霞恩江浪煖
春潮濶萬井蟾寒秋月賒最是河南夫子齋詩書似續稱
名家一朝華胄去衝天共指門楣歎昔賢早擅文章推秋
府尤工政理步星躔三年郎署心如水五馬東來只飲泉
無路蒼生圖報稱惟將繁祉祝神仙新恩正自來光赫箇
界江南典兵畫豈惟三錫念臣勞亦爲連年惜民厄從此
膏霖徧被來恰逢堂室稱觴夕駐望匡廬萬仞峰羈心北
固山頭石使君莫更思庭戶此日龍光殊振古鷹鸇爭誇
綺席新瑤衣詎少階前舞蒲觴遙想勸移旬樞火剛逢月
正午弟醉兄酬百不辭飛觥洗爵寧知數請爲使君寫胸

隔只今厨後方充斥十載林臯放逐餘萬方戎馬乾坤窄
會看夙昔共心許要與英賢競手格願君來作崇朝雲爲
我斲借中臺柏覆被黎民德莫量吳頭楚尾誠天倉黃髮
父老歌盛事衆口猶說周文襄君家典刑在我里巍峩祠
屋畱金閭震澤驚濤任澎湃西山爽氣浮青蒼寄君一幅
徂徠松到日堂開紫翠重雲盤霧裊知何極拂日干霄氣
正濃報翁下有茯苓在爲我頻添琥珀鍾不是尋常稱壽
客丹青東絹聊丰茸

次匡廬上人瞻雲閣韻

草木固緣人遠秀絕壁尤能開錦繡好鳥翩翩競入林浮
雲變化來歸岫塵世隨波作市朝山翁捫腹羅星宿不是
貪邀燕雀栖此間自有神龍守

頂山白龍祠
與瞻雲相望

宿雪纔看臺

榭欹驚雷俄聽簾櫳透消心棋局任旁人袖手艱危還讓
右老衲如能發興過軍持大好時相就竹籬梅舍縱盤桓
霞嶺雲溪從遇遘春來螺髻換新鬟桃柳繽紛盡草菅夜
半鐘聲傳澗戶幾人能共寸心閒

歸雲莊看梅遇雨率筆代柬示同游諸子

去年正月梅滿枝今年二月花猶遲不緣物態好禁勒偶
爾運會多參差幾回索向南枝笑竟日淹留展清眺稠條
疎影互周遮韞玉懷珠早光耀濛濛暮霧連朝雨彷彿佳
人何處所若非伴月賺相思定是愁雲驕不語朝曦稍趁
窗紗媚橫臆山光先破睡趣呼親串忒流連往與寒香慰
憔悴解纜凭欄野外看新烟宿霧羣雲端逡巡園畔春暉
煖颯香樓前秋水寒溪回岫轉風逾急濁浪欹崖雲滿笠

蒼松翠篠籠葱處，磻戶平橋小舟入。此時賓從共優游，此際登臨徧上頭。商量冷蕊簾櫳過，勾引繁花洞壑流。芳醅漱灑歡纔作，音佐炤眼琉璃香拂坐。瞻雲閣上縱遙瞻，臥雪

亭中儘高臥。分籌擊鉢各懷人，撥燼投盤佐酒巡。只道花神能侑主，誰知夜雨更畱賓。須臾雷電交加至，零亂搓捋平覆地。其奈飛觥與未闌，况兼惜玉情尤慙。判將今夕對床眠，欹枕因循欲曙天。他日山中尋故事，西窗翦燭正依然。假饒泥醉住城市，再訪霜華隔歲矣。何似遲回頃刻歡，朝來且看秦坡水。晨雞喔喔卽披衣，步履穿林雪滿幃。淨洗鉛華偏素艷，重添膏沐助清輝。始知一昔眞良燕，轉愛巡檐好花片。苦雨嚴風定爲誰，冰梢鍊幹從他鍊。殷勤把醖喚梅魂，珍重年年載酒尊。世上芳菲何限在，幾人堪與

並黃昏

送黃跨千督糧東省

連天輪輓只東南匝地瘡痍最不堪正喜承恩沾霽澤忽逢移節駕騶驪穠花驛路紅偏迥細柳星韜綠半絳仗鉞建牙應指日佇看餘潤到江潭

東省連年消息殊白衣紅袖亦崎嶇欣逢旗旆開徐兗預想桑麻入畫圖北望星辰遙捧極南來霖雨應時須昇平漸與皇都近順水和風滿舳艫

贈顧玉書請卹北征

柔風麗日錦帆歌細細柳新花夾蜨垂正自聖明饒露澤敢忘高厚乞恩私千秋碧血雲霄迴一紙黃封草木知莫向清時問遼左看君番似羽林兒

當年禁網僅垂髫誰復寒暄訪故交已任英靈空滯魄更
愁風雨撼危巢春同乳燕鳴晴桁門擁嬌花發露梢
看易名光鉅典恩波稠疊賁江郊

觀瀑逢僧卽事感述

茗華茗葉睟羊首北斗南箕張翕口連朝梅雨暫晴霽趣
向桃源乘間走歷磴攀松窮澗壑褰衣挽帶須前後經行
蘭若稍因循惆悵金容傳塵垢雲堂掛錫杳無人老衲供
茶不掩肘具道連年游羅厄山厨萬事皆從苟幾回持鉢
向行乞復恐一燈誰爲守疫癘填街正流虐檀緣塞耳辭
糧糗忍饑待死只崖屋斧斲瓢探且任負

冰縫瓢探水雲根斧斲薪靈詩

酒肉朱門臭欲薰醜骸盈阜知誰咎我聞此語長太息偷
閒半日低徊久三災劫難共輪廻一雨恩膏得隴畝平疇

漠漠水光連荷笠糾糾人意陡始知露澤本非慳始信饑
荒原不偶緬懷十載親稼穡未敢一飯忘高厚眼見垂魚
半蝨賊心知食肉多稂莠漫嗟贏孽蔽上原誰解年稔乃
天牖致令明聖獨憂勤稠疊絲綸惠窮蔀一寸丹心頻獨
存百年旦暮寧先朽請將世外老婆舌聊爲寰中諄複剖
休侵公帑張氣焰休高私廩誇升斗休逋國賦自貽慙休
冒荒畬增怨藪絲絲粒粒自皇天子子孫孫惟我后艷舞
嬌歌早下塲炊金饌玉空番手何如低頭田舍翁陶然高
枕羲皇叟略約行吟百頃潭鶯簧坐聽千章柳頓頓瓜壺
自翦除時時院落呼親友晝長粗糲儘加餐秋至黃花還
命酒縱乏贏養後人貽省將媿面旁觀醜臨行鄭重語僧
雛香積隨常到我取不向人間求利益不緣過去思消受

持此報佛報君親四海八荒歌大有

朝寒口占次孝柔韻

雨氣嵐光六月秋
桃笙葵扇整驩裘
天公未必乖行令
時序翻疑好逆流
謀國幾人堪後載
祈田無計借前籌
朝來欹枕排愁緒
又聽剛風滿樹頭

百頃池塘水荇秋
經旬伏雨稱披裘
呼童煖熨衣篝火展
簞寒侵澗瀑流
莫復新陳嗟歲事
且招朋好共詩籌
筆牀茶竈渾無恙
貰酒寧須問杖頭

淙淙淫雨滿城秋
動問衝風白布裘
孤負羲皇饒北臥
却疑螢火已西流
占晴急慢憑花鼓
遣悶朝昏賴酒籌
遙想山莊岑寂裏
百重飛瀑挂簷頭

霜葉二首

盡日穿林遶樹行，長年爲爾費心情。
水邊返照鋪金地，嶺上餘霞覆赤城。
乍似蝶驚飄去疾，深疑蟬病墜來輕。
清宵書幌誰憐否，錯聽風聲是雨聲。

曾省流鶯上下啼，綠窗殘夢此中迷。
哀蟬脫後濃陰改，隻雁來時疎影低。
飄絮早應隨逝水，飛花何處歎爲泥。
人間榮謝尋常分，縱遇南華莫强齊。

看菊次韻

爲愛繁英占水鄉，山心不及嶺雲長。
溪深樹樹迎霜色，村近家家漉酒香。
斜日窗紗含素靄，晚風籬落襯流黃。
獨憐旅雁驚人起，時帶寒聲過野塘。

蔣幼輿招飲蠟梅下

不占橫斜影，居然檀腦姿。
杯盤分氣味，阡陌共交知。
預擬

巡檐笑空畱倚笛思今宵冰玉侶長與護霜枝

縞袂原同譜黃衣自別宗焚沉烟更碧啜墨麝逾濃供養
添溫水流連勸小鍾只愁燈焰逼膩蠟旋消鎔

屋小香逾殢尊清坐數移良朋花共煖綺燭夜偏遲歲色
難教駐春風且漫吹一年兩度看酬汝只題詩

壬午除夕和牧齋師韻

老去驚心日月除漫將圖史學畋魚山橫淺黛當檐媚隴
發寒香映竹疎飯舊話長燈炮細送窮愁集酒醒初密雲
正作濛濛態好在占豐太史書

廿載江鄉夢玉除久拚生計付耕漁憂時祗益心頭熱報
國其如髻腳疎邊徼數傳烽火急井閭剛是調徵初團圓
婦子更深坐徙倚平安一紙書

次子後除夕倒押前韻

矮屋平連床上書一樽剛及餞年初
膽瓶梅影浮香暗瓦鼎茶烟麗榻
疎燈火尙堪資夜讀盤飧無復羨朝
漁常年冷淡風光在庭戶何煩更滌
除

癸未元旦

氤氲紫陌想朝正曙色祥烟次第生
北斗昭同催拜舞東風翦綴細裁成
椒盤早覺春燈麗柏酒爭開歲醖清
白首山農無報稱只思重見泰階平

中興雲物候元正上日風光卽漸生
岸柳溪梅尋舊約籃輿小艇試新成
晝長魚鳥過從狎夜淺笙歌侍立清
料得東君與嘉惠春郊先頌海波平

浣溪晚集次子後韻

朱欄曲檻自同縈水面山容入座傾歸鳥趁風猶弄舌好
花怯兩倍含情萬家煙靄林中出一縷晴霞分外明滿眼
濃華收不盡固應久手便詩成

西園牡丹次林若撫韻

絮後鶯前獨自開衝風怯雨送香來含情只合藏金屋體
撰還須占玉臺暫借胭脂畱色相得依林壑露眞才何人
解釋東君意殘馥猶堪覆紫苔

每看拂檻殿殘春想殺當年石季倫萬樹珊瑚搖步障成
群旂旒踏紅茵香凝翠袖尊前舞醉倚明妝燭下新轉眼
穠纖都一夢始知孤寂是良辰

西園牡丹正開表弟施泰先與陶玄舉適至再疊前

韻

愛傍玲瓏綺閣開年年如見故人來鶯雛隔葉窺簾幌蝶
夢偷晴繞砌臺舊樂豈堪充豔舞新詞誰爲繼仙才紛紛
姚魏爭承寵得似凝香伴古苔

芳名已占玉樓春翠密紅輕總絕倫風煖正疑香作霧霞
催還想錦爲茵一時藉草人皆舊前歲看花話轉新徙倚
莫教樓豔過高情勝賞趁良辰

園居雜詠

池涵高樹影層層霞下荷香暗覺增馴鶴久諳芳徑屨飛
蟲競撲水軒燈頻沾白墮招文酒不羨清溪入武陵天女
攜花乘月散敲門何避隔林僧

村徑秋雲冒碧蘿柴車何路得相過幽棲畱客宜栽竹卒
歲謀生有荷蓑放鶴青田宿聽喚飯牛白日且聞歌厨貧

高士知無晒黃葉山齋薦晚禾

清池蘋藻積爲斑小築茅亭三兩間月下琴聲響齋閣雨
餘苔色映門闌蛙能鼓吹何嫌隔石有藤蘿可恕頑近擬
腰鎌隨老圃繁花惡竹頗能刪

地靜從知鷗鷺閒高情不共俗情刪霜林返照明孤嶼野
艇隨潮泊小灣每到鐘殘猶獨坐有時月落不知還柴桑
風味偏饒我策杖憑君日幾攀

蜿蜒羣峰一水環白雲深處著三間鳴禽自逐時花換孤
鶴偏隨野衲還高樹晚來穿漏月小樓霜後獻丹山南湖
浩淼盈盈望尙父遺風或許攀

歸雲莊口占一首

水盡山窮別有天固宜野老結閒緣泉奔鶴石林間響鐘

起龍宮風外傳一幅屏山雲閣裏千株玉樹雪亭前十年
逸興憑高臥莫遣塵氛到枕邊

次友人看梅韻

無風無雨便佳期載酒呼朋日探奇香霧細烘雲塢淨冰
稍偏妮夕陽遲清渠牆角猶窺影新月松間又掃眉逐勝
追歡饒我在肯教閒寂過芳時

送友二首

讀罷新詩枕手眠一時湖海亦前緣摩挲倦眼消長日披
豁閒情付老天蘇子和陶堪自慰蒼生起謝屬何年臨風
更有殷勤囑莫爲塵纓歎惘然

風波如此合高眠莫向蕉陰話宿緣閒裏腳跟方著地熱
人頭上不安天紅綿絮薄宜涼夜綠酒香輕遣逝年最是

身心安穩法異時握手一忻然

送蔣南陔補任建安

菴畫溪山雪漲餘野梅沙柳送行初
棠畱南國美人舍花發東方茂宰居草木也知春有腳郊原爭覩雨隨車
遷鶯不待三年久蚤有桐鄉報最書

劇邑鳴弦屬再彈海邦父老競壺簞
因栽潘令花千樹暫別元卿竹萬竿
嶺表春風畱鶴伴閩南秋月帶琴看
朝廷正置翹材館未許長棲枳棘鸞

和宋爲谿十聲韻

偃蓋盤空十畝陰不分寒暑日蕭森
雲來雲往干何事惹動蒼髯拂拂吟

松聲

噴沫飛濤樹杪懸穿林度壑弄潺湲
不知幽夢山窗熟點

滴時時到枕邊

漏聲

安弦纔拂指痕輕移枕旋教四座清聽到身心俱靜後固知山水本無聲

琴聲

刷羽梳翎風滿林莎庭竹逕夜橫參三聲警露殘更淚一片衝霄萬里心

鶴聲

仙掌初從顧渚回嫩泉活火謾相催白雲滿盃遮畱得驟雨松風爲送來

煎茶聲

五老峰前汗漫遊古松流水近高秋何人戶外遺雙屨一

局真堪竟日畱

棋子聲

臥看牽牛擁畫屏誰教唧唧語中庭催耕催織年年事不是勞人不解聽

夜蛩聲

閱盡羲皇攬化祛流觀山海徧吾廬沈吟坐嘯無人會正

是篝燈夜雨餘

讀書聲

庭院溟濛似浣花
層雲黯黯滯簷牙
古苔一夜添新綠
香篆零星染碧紗

雨滴階聲

搓瑤糝玉徧乾坤
火冷燈青似叩門
書幌定應添晚色
畫檐還擬看朝暾

雪灑窗聲

甲申元旦

移居得地便開眉
恰喜桃符換舊時
雪霽西山浮翠黛
晴曠南陌颺游絲
松風入座香先到
柳眼窺人色已知
學圃種蔬尋活計
如膏細雨樂場師

甲申仲春詠歸雲莊紅點白梅次子后韻

春歸瓊圃最高枝
溪煖瑤姿巧弄奇
檀暈半酣斜並倚
汗珠輕綴點還差
冰綃映合非裁翦
霞綺分張識幻師
若使

風光相借得待看羅薄透凝脂

白詠柘枝妓句

不分霜柯並小叢競將新樣試裁紅桃唇預趁輕烟裏杏
臉偷呈薄霧中鞦墮溪橋冰漸泮香沾簾箔粉先融欲知
冷豔偏誰得最有空山奪化工

詠歸雲莊落梅二首

霏霏漠漠繞村莊雲滿溪橋雪滿廊蘚石堆瓊香作徑鉤
簾擁白玉爲牀中宵漏隙流蟾影亂點驚翻和鶴翔莫道
閒庭成寂寞主人還有九迴腸

幽夢經冬滯北莊清魂映立小迴廊可憐墮白雲封戶猶
有昏黃月到牀野蝶遍尋香宿處谿魚還傍影徊翔顛風
驟雨誰禁得直自難消鐵石腸

甲申秋八月輓仲弟起民三首

一領青衫三十年五番樺燭棘圍邊也知壯士銜枚勇奈
可羸童擁被眠潦倒朱方驢背上淒清老屋桂輪懸書殘
酒盡篝燈畔彷彿秋風放榜前

矩步規翔守一經兄酬弟勸戶嘗扃沈冥祇向杯中物閱
歷相看座右銘荏苒不甘空老大窮愁那復歎零丁年來
到眼迷眊甚誰識吾家舊典型

問訊過從旬日餘酒卮棋局夜窗虛傳家剩有先朝笏計
產曾無下澤車傲骨重泉還太僕清風兩袖見尙書涪陵
寄客英靈在羨爾平生花鄂如

甲申秋渡江感懷

綠窗青幙曉霞開疊嶂層巒入鏡來雨過日華增蕩漾風
微波穀漫漈澗鍾山紫翠疑新沐淮海煙花憶舊醅徒倚

鄉關倍惆悵江南早已最堪哀

半規涼月夜將闌似趁邗溝旅夢殘曉色漸升溪樹黑潮
聲欲漲簾紋寒魚龍莽伏知何意燕雀堂高莫劇安指點
斷雲荒戍裏幾回擊楫過江干



瞿忠宣公集卷七終

後學鎮洋顧師軾校字